

Hahatakei Haeu  
Waliko tuah ti Haeu kola hatakei hani Jon  
tel aposel  
Kakain ti haxewai meng ti he teik  
pepa ie

Jon tel aposel tai teik pepa ie sai ahang 65 muhin ti Jises moih aliawa ape Haeu waxi i hani tesol tonan. Lokon ien laha to aile hahalialu teka kahikahi Krai nake ti xoxoi namilolato ti Jises Krai tel Masiwi ti lato. Tek a ti lato, wawahen ti lato wawakulewa ape kumahe lato ususi saun tenen ti Jises hahanau. Jon to hahakui lato ma pahan lato hani hatapo Haeu tupualato. Jon kakaxi waliko tenen hahataxin pate tuah ma pate lalap ti Haeu hatakei hani i. I kola ka kilan waliko lialun po sohot he tehu pon ie ma puase Satan i to lap aheahele. Tuae Haeu hapuasa Jises Krai ti xoini hatapoi hatesol teka laha to papahoxai i ma tin i kahui hasolia teteka laha hong soh tetan. Ape laha to kapin lian tehue. Kalak pate kuwen wanen ti Jon tai teik pepa ie, tin i hanau hetekie kaha teka ti aope waliko ti Haeu namiloiwen i sohot hani seilon. Kako teka seilon ti Haeu lawe pakata kapitawa kapi Jises Krai ma tu xoxoa kalak na kawatan tenen tenen tunahi kako. Kako kum aka lilioi wanen xoxoi namilokako tetan. Pake puki Haeu huhuali kako ape tap tahi maluhei teteka laha hana hatapo namilolaha hani i. Kako lawe nameni hawanewa ka Jises Krai se tel Masiwi pate pohen, tetel i xoini hatapo lawe waliko lialun.

*Hutuan*

<sup>1</sup> Haeu hatakei hani Jises Krai waliko ti he teik pepa ie lehe i kola hani teka laha soh tetan waliko ti lehe

i sohot. Aile ape i talo tel engelaun kola haniak nga Jon, tel unauan. <sup>2</sup> Ape nga kakaxi hatesol waliko ti nga ningahiwen. Tesol waliko ien salan kakai Haeu kola haniakako sale Jises Krai.

<sup>3</sup> Haeu aile hasolia hani teka laha ridai ma hong auni tesol kakain i ahuma tetan ti nga tatai ie nake taun ti sohotui tesol waliko ie ape i xohiwen.

*Amuam ti Jon haniwa teka kahikahi Jises ti tepanim huohu taon*

<sup>4</sup> Nga tai hahani teka kahikahi Jises Krai laha leili tepanim huohu taon ti texux xux Asia.

Nga kamei Haeu, Holi Spirit ma Jises Krai kola hania-muto lalape soliaialato ma hatona hasoliai tiamuto. Haeu hoi liai ti imat, aoape ma tin i luluainima tutuen ma Holi Spirit liai lawe kapin, tetel neinia lawe waliko. <sup>5</sup> Jises Krai i tetel Haeu hamoihamu imat. Waliko ti i kakak sale Haeu mewenae salan ma i tin pamu masiwian ti lawe masiwi ti tehu pon ie.

Jises Krai waheni hawane kaha ape i mat ti awaiakaha ti kawatan ti lialui woukaha. <sup>6</sup> I aile ape kako sohot seilon ti hahitake nenein tetan, teteka ti lawe kako aile waliko ti Haeu tel Taman kilami haniwen kako. Aweisalukako hani Haeu mewenae hean. Kako haxawawa axe Jises Krai lian tehue, tetel pohen hetekie soliaian pate lalap. Salan wanen.

<sup>7</sup> Hongoa! I luama he maun

ape hatesol seilon ningahi i  
hetekie tataen teka teleian.

Tataen ien seilon ti lawe xux tang hawane

nake ti lialui woulaha.  
Salan wanen.

<sup>8</sup> Haeu tel Masiwi ukek, “Nga se Alfa ma Omega, tetel ti hutuai ma tiliai lawe waliko. Nga hoi liai ti imat, aoape ma tin nga luluainima tutuen. Nga tel poh tapein.”

*Holi Spirit hanamiloa Jon ti ningahiai Jises Krais*

<sup>9</sup> Nga Jon tel akikimuto ti Krai, nga tel tuaumuto ti ailei puase Haeu hahitake nenein tetan. Tin masin amuto, nga kau lungei tatale kawatan nake nga kahikahi Jises Krai. Laha hakau xaxaweni nga hani texux xux kokol axan Patmos nake nga kaxi ahuti kakai Haeu ma lawe waliko tenen salan ti puase Jises. <sup>10</sup> Tehu ngain ti kako teka kahikahi Krai nameni xahatai Jises, Holi Spirit hanamiloa nga ape nga hong lalape kinax tenen masin tangiai suhusuh i wixima sai tehitok. <sup>11</sup> I ukek, “Waliko ti ape o ningahi, tai konginiwa ape hakau haniwa teka kahikahi Krai leili tepanim huohu taon ie: Epesus, Simirna, Pergamum, Tiatira, Sadis, Piladelpia ma Laodisia.”

<sup>12</sup> Nga towiahu paxai ape nga ningahi tepanim huohu tutuhi lul ani gol. <sup>13</sup> Wasolalato tel seilon i pupuxui tehu puxux weluwelun, teik tah gol he patanawan. Tanoman masin ka i tel Nati Seilon. <sup>14</sup> Patun ma ukun paxaxuan ole olawik ma poke mau. A pulan i kamakam hanowi xekei ah. <sup>15</sup> Titi aen talepalep hanowi samen tenen laha lui hauniwen. Kinaxon masin tonui tainiai mau lalap. <sup>16</sup> I akekeni tepanim huohu kohot he tepaun minan manau ma tea ngol hahupaun angian sohotuma he awan. A kawan i kamakam hanowi alon ti lalape ngain.

<sup>17</sup> Ti nga paxaiwa i, nga haputa lioi nga hani he titi aen masin tel seilon maten. Tuaehe i hana tepaun minan manau patul tetak ape i ukek, “Kum maamata. Nga tetel ti hutuiai ma tiliai lawe waliko. <sup>18</sup> Nga tetel lawe moihih. Nga matewen tuahe nga ape moihih lian tehue. Nga tel masiwi ti akeniai matemate ma ti teka laha matewen.

<sup>19</sup> “Aile ape tai konginiwa waliko ti o papaxai, waliko ti i sosohot aoape ma i po sohot imuh. <sup>20</sup> Tesol tepanim huohu tutuhi lul ani gol o ningahiwen, i kikilami teka kahikahi Krai leili tepanim huohu taon ape tesol tepanim huohu

kohot he tepaun minak manau i kikilami tesol engel lato ngangahati teka kahikahi Krai ien.”

## 2

### *Kakain hani teka kahikahi Krai ti Epesus*

<sup>1</sup> Ape imuh i kakane nga ukek, “Tai haniwa tel engel ngahataiai teka kahikahik ti Epesus kewak. Ie se kakai tetel i akekeni tepanim huohu kohot he minan manau ma i tau nanahih wasole tesol tepanim huohu tutuhi lul ani gol.

<sup>2</sup> “Nga tioi waliko ti amuto ailele. Nga paxai tioi lalape puasamuto ti amuto to aile kakapitini kalak kawatan tenen tenen tutunahi amuto. Nga tioi amuto kum tua paxai lioi saun lialun ti seilon ma amuto tohongi paxai teka laha ukek laha aposel ti Krai ape amuto upia tunahiwen ka laha tuahe woinakon. <sup>3</sup> Saka amuto kau lungei tatale kawatan tenen tenen ti seilon hani amuto nake amuto kahikahik. Saka amuto kum aka lioi puasamuto.

<sup>4</sup> “Tuahe hina waliko nga kum amuke wasolamuto. Wawahen ti amuto hani nga kumahe xoxoaian ti imat.

<sup>5</sup> Namilo i kapitiniwa xoxoi wawahen ti amuto ti ape i wakulewen. Sohiwa woumuto ape aile aliakewa waliko ti amuto ailele imat. Na tap, nga luama xaxaweniai tehu tutuhi lul ape amuto silahota tautamus, amuto kum hukuma uke hanowi teka kahikahik. Nga kum aile ukek ien mewenae na amuto towiahu. <sup>6</sup> Tuahe hina waliko ti nga waheni leilomuto. Amuto watakai hawane lialui puase teka Nikolaitan hanowi ti nga watakai.

<sup>7</sup> “Na amuto hina taxing ti hongoi kakain, amuto hong matainiwa waliko ti Holi Spirit kaakane hatesol kahikahik. Tel na i waxaini salinia totohong ma lawe waliko lialun, nga hani i aniai huai pata ti i xexex he kini

Haeu ti tesol soliai tonan. Teteka laha ani huai pata ien, laha to kapi Haeu lian tehue.”

*Kakain hani teka kahikahi Krai ti Simirna*

<sup>8</sup> Ape imuh i kakane nga ukek, “Tai haniwa tel engel ngahataiai teka kahikahik ti Simirna kewak. Ie se kakai tetel ti hutuiai ma tiliai lawe waliko, tetel i mat ape i moih aliawen.

<sup>9</sup> “Nga tioi kawatan tenen tenen ti laha hahani amuto ma tin ti amuto tap soxi. Tuahe amuto xuhai waliko ti Haeu. Nga tioi hina seilon laha kaxi sawateni kakain puputa sale puasamuto. Tin laha ukek laha se Ju teka seilon ti Haeu tuahe salan tetan laha seilon ti Satan. <sup>10</sup> Kum maamata tesol kawatan lehe ape i tunahi amuto. Hongoa! Satan hanamiloa teka seilon ti kalabusiamuto ti tohongiai xoxoi namilomuto tetak. Amuto kau kawatan ien ti teik taun kukunun. Amuto tu xox tatalewa tetak kalak na laha telei amuto. Ape nga hani kahumuto tonain tuah kapi Haeu ti tap tahi tapoan.

<sup>11</sup> “Na amuto hina taxing ti hongoi kakain, amuto hong matainiwa waliko ti Holi Spirit kaakane teka kahikahik. Tel na i waxaini saliniai totohong ma lawe waliko lialun, i kum uke tehu kawatan imuh ti tap tahi tapoan.”

*Kakain hani teka kahikahi Krai ti Pergamum*

<sup>12</sup> Imuh i kakane nga ukek, “Tai haniwa tel engel ngahataiai teka kahikahik ti Pergamum kewak. Ie se kakai tetel tea ngolun hahupaun angian.

<sup>13</sup> “Nga tioi amuto toto leili taun ti Satan neini hahawane kilan seilon. Tuahe saka amuto hamalum tatale kahikahik wanen ma amuto tai aka lioi xoxoi namilomuto tetak. Kalak ti lokon laha telei tel unauak

pate solian axan Antipas leili tehu taon ti amuto, amuto tu xoxox tutuen tetak.

<sup>14</sup> “Tuahe hina palaiai waliko nga kum amuke leilomuto. Tekā ti amuto usiwi waliko ti Balam hahanau. I itini namili tel masiwi Balak ti aleheteniai teka Israel ti aniai an tenen laha ailewen pali hani haeu tenen kumahe salan ma ailei saun lialun ti wawan hehin. <sup>15</sup> Tin masin teka ti amuto usiwi waliko lialun ti teka Nikolaitan hahanau. <sup>16</sup> Aile ape towiahua ti tesol waliko ien. Na tap, kum kue nga luama ti hil pahoxaiamuto tea ngol he awak i se kakai Haeu pate tuah.

<sup>17</sup> “Na amuto hina taxing ti hongoi kakain, amuto hong matainiwa waliko ti Holi Spirit kaakane teka kahikahik. Tel na i waxaini saliniai totohong ma lawe waliko lialun, nga axi i an tuah ti Haeu alolomeni hani kahun. Tin nga hani i tehu hat papaxaxun hina tenen ax haun ti Haeu taiwen. Tap tel seilon tioi tenen ax ien, mewenae tetel ukei tehu hat.”

*Kakain hani teka kahikahi Krai ti Tiatira*

<sup>18</sup> Imuh i kakane nga ukek, “Tai haniwa tel engel ngahataiai teka kahikahik ti Tiatira kewak. Ie se kakai tel Nati Haeu, tetel pulan i kamakam hanowi xekei ah ma titi aen i talepalep hanowi samen tenen laha lui hauniwen.

<sup>19</sup> “Nga tioi waliko ti amuto ailele. Nga tioi wawahen ti amuto, xoxoi namilomuto tetak, soliai pupuwasamoto ma ti amuto tu xox tatale kalak ti kawatan tutunahi amuto. Solian ti amuto ailele ao pe ie, i xoiniwen ti imat.

<sup>20</sup> “Tuahe hina waliko nga kum amuke leilomuto. Tekā ti amuto paxai lioi saun lialun leilomuto, tetenen ti tel hehin ti imat axan Jesebel ailele, tetel i putini ukek ka i tel kuluiai kakai Haeu. Tekā ti amuto usiwi tutuen lialui woun ape i neini hasele teka unauak ailei saun lialun ti wawan hehin ma aniai an ti laha ailewen pali hani waliko tenen kumahe salan Haeu. <sup>21</sup> Nga axiwen

amuto taun ti na amuto towiahu ti tesol saun lialun ien tuahe kumahe pahamuto.

<sup>22</sup> “Aile ape teteka ti amuto to ailele saun lialun ti wawan hehin masin ti Jesebel hahanau, nga hatinu halialu amuto ape nga axi amuto kawatan tenen lalap, halik na amuto towiahu ti lialui woumuto. <sup>23</sup> Nga telei xaxaweni teteka laha usi saun tenen ti Jesebel hahanau. Ape teka kahikahik paxai tioi ka nga tetel nga tioi hatapo namil hetekie isiai pahe seilon. Nga kahui hapoponowi hani amuto usiwa waliko ti amuto ailele.

<sup>24</sup> “Tin hina kakaiak hani amuto teka liai leili Tiatira, teteka ti kumahe amuto usi saun tenen ma waliko ti laha ukek kakain tuah ti Satan hatakei hani teka unauan. Nga kum hakawata aheke amuto na tenen. <sup>25</sup> Tuahe aile kapitiniwa soliai puasamuto ma tu xoxoa ti namilomuto tetak atengi taen nga aliama.

<sup>26</sup> “Teteka laha waxaini saliniai totohong ma lawe waliko lialun ma laha aile usi nauna tetak atengi taen matealaha, nga hani laha neiniai teka seilon ti xux tenen tenen.

<sup>27</sup> “Nga hani lato poh ti neiniai seilon masin ti nga kema ti Haeu tel Tamak.

Nenein ti lato ahian wanen  
kane teka seilon laha tahi kakai Haeu.  
Lato aile halialu teka ien hanowi patula kalas  
ti i put ape i takel wikawika.’ *(Ps 2:8-9)*

<sup>28</sup> “Nga hani hetekie lato tehu kohot towisaian ti kolakol ka lato waxainiwen lawe waliko lialun.

<sup>29</sup> “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

<sup>1</sup> Imuh tel masiwi kakane nga ukek, “Tai haniwa tel engel ngahatiaia teka kahikahik ti Sadis kewak. Ie se kakai tetel i akekeni tesol tepanim huohu kohot ma i xuhai Holi Spirit.

“Nga tioi waliko ti amuto ailele. Seilon sokok namilomuto xoxoan tetak tuahe salan wanen, xoxoi namilomuto tetak i tapoen. <sup>2</sup> Kanipetiwa sale woumuto. Waliko solian ti amuto ailele imat, i tapo kakalutawa. Haxoxo aliakewa nake nga kum namilo i ukek puasamuto pate sawisawin usiwa namili Haeu. <sup>3</sup> Aile ape nameni aliakewa kakai Haeu ti amuto hongoen. Towiahua ti lialui woumuto ape puas usiwa tenen kakain ien. Na amuto kum towiahu, nga lua hanowima tel seilon xuxuina, amuto kum tioi hawane loke tahiaiaik.

<sup>4</sup> “Tuahe hina teka ti amuto ti Sadis, amuto kum ailele saun tenen i halolo amuto. Amuto uke puxux tenen papaxaxun ma amuto xohixohin wanen kapik nake ti soliai woumuto. <sup>5</sup> Hatesol seilon laha waxaini saliniai totohong ma lawe waliko lialun, puxuaulaha tin papaxaxun. Nga kum susuni wanen axalaha ti Haeu tai konginiwen ti ukei tonain kapin ti tap tahi tapoan. Ti puli Haeu tel Tamak ma teka engelaun nga kaxi ahuti ka teka seilon ien se tetak.

<sup>6</sup> “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

### *Kakain hani teka kahikahi Krai ti Piladelpia*

<sup>7</sup> Imuh i kakane nga ukek, “Tai haniwa tel engel ngahatiaia teka kahikahik ti Piladelpia kewak. Ie se kakai tetel i sawisawin tapein ma lawe salan. I tel Masiwi tapein. Masin ti lokon tel masiwi David neini teka Ju, i tetel neiniai lawe seilon. Na i sowini tenen na waliko, tap tel pon halinian. Na i halini tenen, tap tel pon sowinian.



<sup>8</sup> “Nga tioi waliko ti amuto ailele. Nga tioi ka ti puli teka seilon liai axamuto kumahe lalap. Tuahe amuto akeni kokongini tutuen nauna tetak ma amuto tai puluhini ka amuto tetak. Nga hei haniwen amuto tewau aweisal ti tap tel pon konginian. <sup>9</sup> A teka laha putini laha seilon ti lotuiai Haeu, tuahe salan tetan laha seilon ti Satan, nga aile lehe laha lokuha lakua hani aemuto ape laha hatesol paxai tioi ka nga waheni amuto.

<sup>10</sup> “Masin ti nga honewen amuto, saka amuto tu xox tatale tetak kalak kumahe malimun ti usian. Aile ape nga awai amuto ti tehu kawatan i luluainima ti lehe Haeu tohongi paxai woi lawe seilon. <sup>11</sup> Luaiak hani kapimuto xohiwen. Aile kapitiniwa soliai puasamuto ma tu xoxoa ti namilomuto tetak lehe amuto kum loio soliai kahumuto ti Haeu apeseniwen. <sup>12</sup> Teteka na laha waxaini saliniai totohong ma lawe waliko lialun, nga aile laha sohot hanowi kuku tuah ti leili Ingi Haeu. Laha hamalum hawane kapi Haeu. Ape nga tai axe Haeu tel Tamak he kawalaha kolaian ka laha ti Haeu. Nga tai hetekie axe tehu taon ti Haeu axan Jerusalem haun i ahuma ti tonan, kolaian ka laha to tehu taon ien lian tehue. Tin nga tai hetekie tenen axak haun, kolaian ka laha pakata xoxoen kapik.

<sup>13</sup> “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

*Kakain hani teka kahikahi Krai ti Laodisia*

<sup>14</sup> Imuh i kakane nga ukek, “Tai haniwa tel engel ngahataiai teka kahikahik ti Laodisia kewak. Ie se kakai tetel i lawe salan. I tel unau i Haeu wanen ma waliko ti i kakak sale Haeu mewenae salan. Nake ti i, Haeu tanomi lawe waliko.

<sup>15</sup> “Nga tioi waliko ti amuto ailele. Nga tioi ka amuto kumahe ahian ma na wawaxixin ti ailei lawe puasak.

Nami amuto kewa tenen ti lalu. <sup>16</sup> Tuaehe amuto kumahe ahian ma na wawaxixin, amuto tuahe patalal. Amuto woinakon ailei lawe puasak. Tap wanen anan. Aile ape nga tale tehitok hani amuto. <sup>17</sup> Amuto ukek ka amuto tapai hawanewen ti lawe waliko. Tuaehe amuto kum paxai tioi ka amuto tae hawane waliko ti Haeu pahan. Amuto seilon tenen tap wanen amuam. Amuto masin teka pulaxa ma makahul. Ala amuto hienake aliakewa woumuto. <sup>18</sup> Na pahamuto wanen lehe amuto tapai hawane, haelieliwa usiak ti haxoxoi namilomuto ti Haeu. Ien se pate tuah masin gol laha lui hauniwen. Amuto usiwa soliai wouk lehe amuto sosoi maia papaxaxun i kola ka amuto ape haun hanowi seilon tenen i sosoi maia atuhian ti i makahul. Hong matainiwa kakaiak lehe amuto xeu hawane ti lawe waliko salan hanowi seilon tenen i hana marasin hani he pulan lehe i paxapax alua.

<sup>19</sup> “Teteka nga waheni, nga tumei ma nau hasawi ti laha tahi kakaiak. Towiahua ti lialui woumuto ape hahiawa ailei puasak.

<sup>20</sup> “Hongoa! Lawe nga tu kiikini kahip ti aweingamoto. Na amuto hong kinaxok ape hei aweing, nga soh ape kako to ang he lawalau.

<sup>21</sup> “Teko laha waxaini saliniai totohong ma saun lialun, nga hani laha to kapik ti neiniai seilon masin ti nga waxainiwen ape nga kapi Haeu tel Tamak neiniai seilon.

<sup>22</sup> “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

<sup>1</sup> Muhi tesol waliko ien, Holi Spirit hanamiloa ulea nga ape nga ningahi tewau aweing hean ti tone Haeu. Tin nga hong ulea lalape tenen kinax masin tangiai suhusuh. I wix ukek, “Lua hanima kapik patul lehe nga kola hani o waliko ti na i sohot muhin.” <sup>2</sup> Tuhan tehue Holi Spirit kapiti namilok ape nga ningahi tehu totoan pate tuah ti tone Haeu ti tel seilon toto. <sup>3</sup> Tanome tel seilon ien i talepalep hanowi waliko tenen pate i kamakam. Kakalini tehu totoan ien tehu poto, lalape xewaian masin leili sup ti i tai unauna na alon hokai hatalepalepa. <sup>4</sup> Tin 24 totoan tuah liai kakalini i hetekie 24 masiwi toto ien. Puxuaulato papaxaxun ma patulato hin tah tenen ani gol. <sup>5</sup> Ahuma he tehu totoan tuah xepai usil ma tangiai kuhuh. Mateiwaun tepanim huohu lul kamakam. Lato kikilami Holi Spirit, tetel pate pohen. <sup>6</sup> Mateiwaun tin masin kanitax tenen na pate fanenan ma xewan.

Hinalo seilon tutu kapi tehu totoan ien, hua papan tepaun ape hua liai tepaun. Kilan pulalato, sai matalato ma tehitolato. <sup>7</sup> Tel ti lato tanoman masin tok pusi lalap axan laion, tel liai masin tok bulmakau, tel ulea kawan masin kawe seilon ma tel tapeinan masin tok keihat paun holaian. <sup>8</sup> Lato tel tel hina paulato masin pai manixux tuahe paulato tepanim tehu. Kilan pulalato he paulato, patul ma hahitakan. Ngain ma ipong lato to kakak ukek, “Haeu tel Masiwi i sawisawin tapein ma tel poh tapein.

I hoi liai ti imat, aope ma tin i luluainima tutuen!”

<sup>9-10</sup> Tapai na tesol hinalo seilon ien kak kemulik ma haxawa axe tetel i toto he tehu totoan tuah, tesol 24 masiwi lawe lato lokuha lakua mateiwaun ape lotui i, tetel tap tahi matean. Tesol tah he patulato ti kolai masiwiwalato, lato hana xaxaweni hani mateiwai tehu totoan pate tuah. Ape lato ukek,

<sup>11</sup> “Haeu tel Masiwi ti amite,  
tapai hawane amite haxawa axam

ma sameni lalape pohem  
 nake o tetel tanomiaia lawe waliko.  
 Lawe waliko ti o tanomiwen  
 i ahuma ti puki namilom.”

## 5

### *Teik pepa tuah ma tok sipsip uluha*

<sup>1</sup> Muhin nga ningahi teik pepa tuah luminan he min manau ti tetel i toto he tehu totoan tuah. Taian papan hahupaun a pakatan, tepanim huohu papakat uke konginian. <sup>2</sup> Ape nga ningahi tel engel pate pohem i tilol kamekam, “Aita tel i sawisawin ti puli Haeu i tapai tosei tesol papakat ma heiai teik pepa ie?” <sup>3</sup> Tuahe tap tel seilon ti tone Haeu, tehu pon ie ma na hahitakan i tapai heiai teik pepa tuah ien ma paxaian.

<sup>4</sup> Nga tang welu hawane nake tap wanen tel tapai. <sup>5</sup> Ape tel ti tetesol masiwi i hone nga ukek, “Kum tangitang! Hongoa! Tetel masiwi pate pohem i nakuama ti teka Juda ti tel masiwi David, i waxaini xoiniaia lawe waliko lialun. I tapai hawane tosei tesol papakat ti teik pepa tuah ien ma paxaian.”

<sup>6</sup> Muhin nga ningahi tok sipsip uluha tanoman masin ka totok laha teleimu. I tutu kapi tehu totoan tuah, kakalini i tetesol hinalo seilon ma tetesol 24 masiwi. He patun tepanim huohu sulaun ma tepanim huohu pulan lato kikilami Holi Spirit tel pate pohem ti Haeu talo hani hatesol xux he tehu pon ie. <sup>7</sup> I kiheta waxi teik pepa tuah he min manau ti tetel i toto he totoan tuah. <sup>8</sup> Ti i akeniwa, tetesol hinalo seilon ma tetesol 24 masiwi lato lokuha lakua mateiwai tok sipsip uluha ien. Tel tel ti lato akekeni tehu harp, waliko ti wexoiaia tangiaia pak. Tin lato akekeni hetekie kapi ani gol. Leilon sanda tenen poun pate solian i kikilami lotu ti teka seilon ti Haeu. <sup>9</sup> Lato pakui tenen pak haun ukek,

“O tapai hawane waxiai  
 teik pepa buah  
 ma tosei papakat  
 ti heian  
 nake laha telei o  
 ape ti mateam o uke  
 kahi lialui woi seilon.

O aile ukek ien lehe teka  
 seilon ti lawe xux  
 ma nenex,  
 kakaialaha tenen tenen, laha sohot unauai Haeu wa-  
 nen.

<sup>10</sup> O aile ape laha sohot seilon ti hahitake nenein ti Haeu,  
 teteka laha aile hatapo waliko ti i kilami haniwen  
 laha  
 ma aweisalulaha hani i mewenae hean.  
 Ape laha neini teka seilon ti tehu pon ie.”

<sup>11</sup> Ti nga to paxapax nga hong kinaxe teka kilai engel,  
 mongohualaha kaha kum pon wanen wexean. Laha tu  
 kakalini tehu totoan buah, tetesol hinalo seilon ma tetesol  
 24 masiwi. <sup>12</sup> Laha pak ausisini ukek,

“Tok sipsip uluha ie se totok laha teleimu.  
 I tapai hawane kako sameni lalape pohen,  
 anesoan ma kuin.

I pono wanen ti lawe waliko.  
 Kako haxawawa axan.”

<sup>13</sup> Ape nga hong lawe seilon ma manihuh ti tone Haeu, he  
 tehu pon ie ma hahitakan hetekie ti itax, laha pak ukek,

“Kako sameniwa lalape pohe tetel i toto  
 he tehu totoan buah  
 hetekie tok sipsip uluha.  
 Kako haxawawa axalalu lian tehue.”

<sup>14</sup> Tetesol hinalo seilon kak ukek, “Salan wanen!” Ape  
 tesol 24 masiwi lokuha lakua lotuialalu.

## 6

*Tetesol papakat ti teik pepa buah*

<sup>1</sup> Muhin nga ningahi tok sipsip uluha ien i tose tehu ti tesol tepanim huohu papakat ti he teik pepa buah. Ape nga hong tel ti tetesol hinalo seilon i tilol hanowi tangiai kuhuh ukek, “Kiliwama!” <sup>2</sup> Ti nga paxawa, nga ningahi tok hos papaxaxun tutu matak. Tel seilon i toto patul tetan i akekeni tehu ponar. Ape Haeu hana teik tah buah he patun kolaian ka i masiwi. Ti i kiliwawa, i waxaini kilan hilehile atengi tataen i xoiniwa lawe waliko lialun.

<sup>3</sup> Ti tok sipsip uluha tosewa tehu papakat liai, nga hong tel liai ti tetesol hinalo seilon ukek, “Kiliwama!” <sup>4</sup> Ape tok hos kakan wanen kiliwama. Tel seilon patul tetan, Haeu sowini hani i hatanoi wasol lehe teka seilon he teletel. Aile ape Haeu hani i tea ngol weluwelun ti hile.

<sup>5</sup> Ti tok sipsip uluha tosewa tehu papakat liai, nga hong tel liai ti tetesol hinalo seilon ukek, “Kiliwama!” Ti nga paxawa, nga ningahi tok hos polupolun tutu matak. Tel seilon patul tetan akekeni waliko ti kolongenai kawate an. <sup>6</sup> Ape nga hong tenen kinax i ahuma ti tetesol hinalo seilon i ukek, “Kilo tewaok suka ma kilo tehu komem kahun pate lalap. Hapuasa aluiniwa wel ma waen uke i tae.”

<sup>7</sup> Ti tok sipsip uluha tosewa tehu papakat liai, nga hong tel tapeinan ti tetesol hinalo seilon i ukek, “Kiliwama!”

<sup>8</sup> Ti nga paxawa, nga ningahi tok hos tutu matak. I papaxaxui nalenalen, tanoman i tinun. Tel kiliwakean axan Matemate ma tel liai kapin axan Hades i kikilami tesol tone teka maten. Haeu sowini hani lalu teleiai teka seilon laha toto tenon ti tehu pon ie. Lalu hapuasa ngol weluwelun ma manihuh tenen tumun kalimen hetekie lalu hahitolo ma hatinu seilon.

<sup>9</sup> Ti tok sipsip uluha tosewa tehu papakat liai, nga ningahi tesol tone waliko ti seilon kau hani Haeu. Hahitakan nga ningahi teteka seilon ti kemuk teka liai telei nake lato kaxi ahuti kakai Haeu ma lato tu xox ti kakain salan tetan. <sup>10</sup> Lato tilol eliel hawane ukek, “Haeu tel Masiwi tapein, tel sawisawin tapein ma salan wanen, malehe ape kuehuan ia na o paxai kolongeni woi lawe seilon ti tehu pon ie ape o kahui aliake hani teka laha telei amite?” <sup>11</sup> Ape tel tel ti lato uke tehu puxux papaxaxun a weluwelun. Muhin Haeu hone lato ka nutomu atengi tataen ti teleiai teka akikilato ti Kraiss, teka tuaulato ailei puase Haeu mongohualato i meiwa ti Haeu kilamiwen.

<sup>12</sup> Imuh nga ningahi tok sipsip uluha ien tose tehu papakat liai ti teik pepa tuah. Ti i tosewa, xux nuaa eliel hawane. Alon i kum kam ape i tilok hawane. Pangapang sohia hahutuia hani kakan masin wanen kaka. <sup>13</sup> Kohot ti he maun put hani itan hanowi huai pata ti aupol huei haputa. <sup>14</sup> Maun tapo hanowi na teik tahi i lumina alia. Hatesol xux ma maunten laha naxia ti tutuhalaha.

<sup>15</sup> Ape teka masiwi tenen tenen ti tehu pon ie hetekie teka masiwi ti hile, teka seilon kilan soxi, teka axalaha lalap, teka laha unauai seilon ma teka laha kumahe unauai seilon, laha hatesol muna hani wal ti he pot ma wasole pot he maunten. <sup>16</sup> Laha tiloi eliel hahani maunten ma pot ukek, “Put atuhi munenima amite ti puli tetel i toto he tehu totoan tuah ma ti lengei tok sipsip uluha kapin. <sup>17</sup> Tehu ngain lialun ti lengealalu tahiaawen. Tap tel i kuosel ti tenen kawatan ien.”

## 7

### *Teteka seilon hina kikilam ti Haeu*

<sup>1</sup> Muhin nga ningahi hinalo engel lato tu tapaiwen hinalosumun ti tehu pon ie. Lato kokongini hinalosol ahoi aupol lehe i kum ah hani xux, kanitax ma tea na pata.

<sup>2</sup> Haeu hani lato poh ti aile halialui xux ma kanitax. Tuae tel engel liai i sohotuma sai angiha. I akekeni waliko ti hanai kikilam ti Haeu tel tap tahi matean. I tilol eliel hani tesol hinalo engel ukek, <sup>3</sup> “Kum aile hahaliolumu xux, kanitax ma na pata atengiwa taen amite hana kewa kikilam ti Haeu he kawe teka unauan.”

<sup>4</sup> Ape nga hong ka mongohe teteka seilon laha hina kikilam ti Haeu 144,000 seilon ti lawe nenex ti Israel.

<sup>5</sup> Teteka laha ahuma tehu nenex ti Juda 12,000 seilon, tehu ti Ruben 12,000, tehu ti Gad 12,000.

<sup>6</sup> Tehu nenex ti Aser 12,000 seilon, tehu ti Naptali 12,000, tehu ti Manase 12,000.

<sup>7</sup> Tehu nenex ti Simeon 12,000 seilon, tehu ti Livai 12,000, tehu ti Isaka 12,000.

<sup>8</sup> Tehu nenex ti Sebulun 12,000 seilon, tehu ti Josep 12,000 ma tehu ti Benjamin 12,000.

*Teka kilai seilon puxuaulaha papaxaxun a weluwelun*

<sup>9</sup> Muhin nga ningahi teka kilai seilon mongohualaha kaha kum pon wexean. Laha ti lawe xux, nenex tehu tehu ma kakaialaha tenen tenen. Laha tutu mateiwai tetel Masiwi i toto he tehu totoan tuah ma totok sipsip uluha kapin. Puxuaulaha papaxaxun a weluwelun ma laha akekeni kai hatoh. <sup>10</sup> Ape laha tilol eliel ukek, “Haeu tel Tamakaha, tetel i toto he tehu totoan tuah ma totok sipsip uluha kapin, lalu se awaiakaha.”

<sup>11</sup> Hatesol engel laha tu kakalini tehu totoan tuah, tetesol 24 masiwi ma tetesol hinalo seilon. Laha lokuha lakua hani itan mateiwai tehu totoan tuah ien ape laha lotu sameni Haeu. <sup>12</sup> Laha ukek, “Salan wanen. Kako sameniwa lalape pohe Haeu, anesoan ma kuin.



Kako haxawawa axan ma  
 kak kemulik haniwa i lian tehue.  
 Salan wanen.”

<sup>13</sup> Ape tel ti tesol 24 masiwi kamei nga, “Aita tesol seilon  
 ie puxuaulaha papaxaxun a weluwelun? Laha ahuma ia?”

<sup>14</sup> Nga pahoi ukek, “Tel masiwi, nga kum tioi, puki o  
 tioi.”

Ape i kakane nga, “Teteka seilon ie laha waxainiwen  
 kaui kawatan lalap. Puxuaulaha papaxaxun nake ti matei  
 tok sipsip uluha i nuhi hauniwen laha ti lialui woulaha.

<sup>15</sup> “Aile ape laha hahamalum kapi Haeu  
 mate tehu totoan tuah tetan  
 ape ngain ma ipong laha ailele puasan leili tehu  
 Ingan.

Ape ngangahat tetan i kalauhi laha.

<sup>16</sup> Tap hitolo ti tenen na waliko tunahi ulei laha.

Kekei alon ma na waliko liai tin i kum keti laha.

<sup>17</sup> I sohot ukek ien nake totok sipsip uluha kapi Haeu  
 i ngangahati ma neneini laha hani Haeu

masin ti na kinawe seilon pate paxepaxen  
 ape tel i neini laha hani tehu kan.

Ape tatahan kum hatangi ulei laha  
 nake Haeu xaxaweni hatapo lawe kawatan.”

## 8

### *Tehu papakat tapeinan ma tehu sanda poun pate solian*

<sup>1</sup> Ti tok sipsip uluha ien tosewa tehu papakat tapeinan,  
 sai leili aua tewaok tap wanen tangiai tenen na waliko ti  
 tone Haeu. <sup>2</sup> Ti nga paxawa, nga ningahi tepanim hua  
 engel tutu mate Haeu. Tel tel ti lato uke tehu suhusuh.

<sup>3</sup> Muhin tel engel liai nahih tu mateiwai tehu totoan  
 tuah kapi tesol tone waliko ti haniai Haeu. I akekeni tehu  
 kapi ani gol ti lohiai sanda tenen poun solian. I uke kilan  
 tenen sanda ien lehe i hani Haeu hetekie lotu ti teka seilon

tetan, patul ti tesol tone hanian waliko. Tesol tone waliko ien ani gol. <sup>4</sup> Ti sanda ien lulua, axuan i hok sawile he tehu kapi ti tel engel akekeni hani Haeu hetekie lotu ti teka seilon tetan. <sup>5</sup> Muhin tel engel waxi nawal xoan he tesol tone waliko ti haniai Haeu, i lohi hani tehu kapi ape i towi hani tehu pon itan. Ti i towiwa, i hatano lalape tonui kuhuh, xepai usil ma xux i nuea eliel.

*Tepanim huhua engel ma tepanim huohu suhusuh*

<sup>6</sup> Muhin, tesol tepanim huhua engel lato akekeni suhusuh, lato apepas kuinian.

<sup>7</sup> Ti tel engel imat kuiniwa tehu suhusuhaun, lalape puli akah tenen pate waiwain ma ah hetekie kaka, i put hani tehu pon itan. I lui tenon ti tehu pon itan hetekie tenon ti pata ma hatesol pahoah.

<sup>8</sup> Ti tel engel usian kuiniwa suhusuhaun, tenen waliko masin maunten lalap i xek towia hani itax. Tenon ti kanitax kolita hani kaka. <sup>9</sup> Tenon ti lawe waliko moihin ti itax mat ma waian ti langalang, tenon ti laha manan.

<sup>10</sup> Ti tel engel liai kuiniwa tehu suhusuhaun, tehu kohot lalap i xekexek hanowi lul, i putalih he maun hani tenon ti kan ti unum he tehu pon itan. <sup>11</sup> Tehu kohot ien axan Maxaia. I hamaxaia tenon ti kan ape kilan seilon laha mat ti unumian.

<sup>12</sup> Ti tel engel liai kuiniwa tehu suhusuhaun, tenen waliko i aile hialalu tenon ti alon, pangapang ma kohot. Aile ape al tai kam tenon ti ngain tehu ma pangapang hetekie kohot tin i tai kam tenon ti ipong tehu.

<sup>13</sup> Ti nga to paxapax, nga hong tok keihat ngongong he maun patul, i tilol eliel ukek, “Taun pate lialun i luluain-ima. Sikole wanen tolu engel liai kuini suhusuhaulato ape kawatan pate lalap tunahi teka seilon ti tehu pon itan.”

## 9

<sup>1</sup> Ti tel engel liai kuiniwa tehu suhusuhaun, nga ningahi tehu kohot kemuk patul he maun ape i put haniwen he tehu pon ie. I moih hanowi seilon. Haeu sowini hani i heiai mate tewau wal pate walawalan wanen. <sup>2</sup> Ti i heiwa, axuan kilakilan wanen ahutale masin na kaha lui kai pata moihin. Lalape axuan ien i hatiloko kamai al ape xux i tilok.

<sup>3</sup> Ti leili axuan ien kilan wanen kukunalel ahuta hani tehu pon ie. Laha pon wasi halialui seilon hanowi mini anepapap. <sup>4</sup> Haeu halini laha ti aile halialui pahoah, pata tenen tenen ma lawe waliko ti i xexex he hepekeun. Laha aile halialu mewenae teteka seilon tap kikilam ti Haeu he kawalaha. <sup>5</sup> Haeu kum sowini hani laha teleiai teka seilon ien tuahe ti axialato moloan lalap ti leili pangapang tepanim. Moloan ti lato lalamani masin na mini anepapap wasi seilon. <sup>6</sup> Leili tesol ngain ien, lato aile ngah aweisal lehe lato mat tuahe lato kum mat uke. Pahalato wanen lato mat xaxau tuahe matemate kum tunahi lato.

<sup>7</sup> Paxaiai teka kukunalel ien masin teka hos seilon apeseniwen ti hile. He patulaha tah tenen ani gol a kawalaha masin kawe seilon. <sup>8</sup> Ukulaha weluwelun masin uki hehin a nisulaha masin nisi oha. <sup>9</sup> He patanawalaha hina titieh ti hile ani samen ma tangiai paulaha masin tonui kilai hos kikiliwau ti hilehile. <sup>10</sup> Kolohelaha masin ti anepapap hina minun ape laha hapuasa ti halialui teka seilon leili pangapang tepanim. <sup>11</sup> Tel masiwi neinialaha i tetel engel ngahatiaia tewau wal walawalan wanen. Ti kakai Hibru axan *Abadon* ma ti kakai Grik axan *Apolion*. Salangawe tenen ax ien i ukek, “Tetel halialui waliko.”

<sup>12</sup> Kawatan tehu ape i tamusuen tuahe huonen kawatan luluainima tutuen.

<sup>13</sup> Ti tel engel liai kuiniwa tehu suhusuhaun, nga hong tenen kinax i ahuma hinalosumun ti tesol tone waliko ti haniai Haeu. Tesol ien se ani gol i tutu mate Haeu.

<sup>14</sup> Tenen kinax ien kakane tetel i kukuini tehu suhusuh ukek, “Oxoxi lioiwa tetesol hinalo engel xinotan he tehu kan lalap axan Epratis.” <sup>15</sup> Tesol engel ien hoi liai Haeu apeseniwen lehe i hapuasa ti tehu ngain ie. Ape tel engel oxoxi lioi lato ti teleiai tenon ti teka seilon ti tehu pon ie. <sup>16</sup> Tetesol hinalo engel lato neinia teka seilon ti hile he hos. Nga hong ka kilai alaha sai 200 milion.

<sup>17</sup> Ti paxapaxa tetak, titieh ti he patanawe teteka seilon ti hile kakan masin xekei ah, ati polui axaxawan ma tin angoangoi ati polun. Tanome pati teka hos masin pati laion manihuh tenen tumun pate kalimen. Ah ma axuan ahutama he awalaha hetekie salfa, waliko tenen na i lua poun telei seilon. <sup>18</sup> Totolunen waliko i ahutama he awe hos se pate lialun wanen, i telei tenon ti teka seilon ti tehu pon ie. <sup>19</sup> Pohelaha ti halialui seilon i ahuma he awalaha ma kolohelaha. Tanome kolohelaha masin weiko tenen ti atalahi hamangei seilon.

<sup>20</sup> Teteka seilon ti tolunen waliko ien tai telei laha, tin laha tai totowiahu ti lialui woulaha. Laha lotui kakapitini spirit lialun ma waliko tenen laha tua tanomi ani gol, silva, brons, pot ma pata. Tesol waliko ien kum pon i paxapax, hong ma tin kum nahih uke tuahe laha lotui hanowi ka Haeu. <sup>21</sup> Tin laha tai aile lilioi teleiai seilon, apelaha ti hilihil, saun lialun ti wawan hehin ma saun ti xuxuina.

## 10

### *Tel engel ma teik pepa liai*

<sup>1</sup> Muhin nga ningahi tel engel liai pate pohen i momo-sulih tesol tone Haeu. I puxupuxua leili maun hetekie tehu poto onote patun. Kawan kamakam hanowi xame alon a aen masin kuku na i xekexek. <sup>2</sup> I akekeni teik pepa tuah luminan a ape holaian he minan. I hatuhi tepaun aen manau hani itax ape tepaun kalamau ixux. <sup>3</sup> I tilol eliel hawane. Lalape kinaxon masin uhuhai laion, manihuh

tenen tumun kalimen. Ti i tiloa, tepanim huohu kuhuh wixile.

<sup>4</sup> Pahak nga tai waliko tenen ti kuhuh kakak tuahe tenen kinax i ahuma ti tone Haeu i ukek, “Kum tatai. I tai meiwa taun ti kaxi hatakeiai waliko ien.”

<sup>5</sup> Muhin tetel engel nga ningahi i tutu itax ma ixux, i tulini tepaun minan manau hani tone Haeu. <sup>6</sup> Ape i kak kuinake ti axe Haeu tel i moihin lian tehue, tel i tanomi maun aheah, tehu pon ie, kanitax ma hatesol waliko heihon. I ukek, “Haeu kum hatalia aheke waliko ti i namiloiwen. <sup>7</sup> Taen ti na tel engel tapeinan kuiniwa tehu suhusuhaun, hatesol waliko ti Haeu tai hatakei hani seilon ape i sohot poponowi masin ti i kakanewen teka unauan ti kuluiwai kakaian.”

<sup>8</sup> Ape tenen kinax ahuma ti tone Haeu kakane ulea nga i ukek, “Waxiwa teik pepa tuah he mini tel engel i tutu itax ma ixux.”

<sup>9</sup> Nga nahih haniwa kapi tel engel ape nga kamei na i hani nga teik pepa tuah. I hone nga ukek, “Waxiwa ape aniwa. I aile hamaxaia leili tiam tuahe namun ti he awam paoaian suka.” <sup>10</sup> Nga waxiwa teik pepa tuah he minan ape nga ani. Namun ti he awak paoaian wanen suka tuahe ti nga tolomiwa i hamaxaia hawane leili tiak. <sup>11</sup> Ape i hone nga ukek, “Kaxi ahuti tatalewa kakai Haeu. Kaxi hatakeiwa waliko na i sohot hani teka seilon tenen tenen ti xux tesol tesol, kakai alaha tenen tenen hetekie teka masiwi ti laha.”

## 11

### *Hua seilon kuluiwai kakai Haeu*

<sup>1</sup> Muhin nga uke teik pata ti kolongeniai welui waliko ape Jises hone nga ukek, “Nahih kolongeniwa tehu Ingi Haeu ma tesol tone hanai waliko ti hanian ape wexewa mongohe seilon laha lolotu ien. <sup>2</sup> Tuahe kum kokolongeni soxi tini Ingi Haeu sai melal nake ien Haeu haniwen teka

laha kum tioi i. Imuh, leili 42 pangapang, laha aile halialu teka seilon ti Jerusalem tehu taon pate tuah ti Haeu. <sup>3</sup> Ape nga hapohea hua seilon kaxiai menge Haeu lehe lalu kului kakaian leili 1,260 ngain. Telok ien lalu puxui puxux tetenen i kola lalape tatahan.”

<sup>4</sup> Huhua seilon ien lalu masin hua pata tenen oliv ma huohu tutuhi lul ti i tutu mateiwai Haeu tel Masiwi ti tehu pon ie. <sup>5</sup> Na tel tohongi hamangealalu, xekei ah i pusuama he awalalu teleian. Teka laha watakai lalu ma aile halialu lalu, laha mat ti xekei ah ien. <sup>6</sup> Lalu hina poh ti konginiai maun lehe akah kum ux leili taun ti lalu kukului kakai Haeu. Tin lalu pon kolitiniai lawe kan hani kaka ma hatanoi kawatan tenen tenen hani tehu pon ie tuahe telao ti na pahalalu.

<sup>7</sup> Tataen na lalu tiliwa kaxi ahutiai kakai Haeu, tel spirit lialun tanoman masin manihuh tenen tumun pate kalimen i sohotule he tetewau wal walawalan wanen. I pamu kuiaian ape i telei lalu. <sup>8</sup> Ti ngain toluhu tewaok tupualalu tua engeeng maten he aweisali tetehu taon lalap ti laha telei Jises tel Masiwi ti lalu. Tehu taon ien laha kolongeni hani Sodom ma Iqip. <sup>9</sup> Leili taun ien, seilon ti lawe xux ma nenex, kakaialaha tenen tenen laha paxai kakapitini tupualalu ma laha halini tihinalalu. <sup>10</sup> Teka seilon ti tehu pon ie laha amuke hawane matealalu. Ti amuamualaha laha aile angiain lalap ma laha he axiax soxi. Laha amuam hawane nake huhua kuluiakai kakai Haeu ti axialaha kawatan, lalu ape maten.

<sup>11</sup> Tuahe muhi ngain toluhu tewaok, hanawai Haeu soh hani leilolalu ape i hamoiha aliake lalu. Ti lalu tule, hatesol seilon ox tuhi hawane laha ti waliko laha papaxai. <sup>12</sup> Muhin lalu hong tenen kinax tiloma tesol tone Haeu, “Lua hanima patul.” Ape teteka seilon watakaialalu laha papaxai ti lalu luluainiwa he teik maun hani tesol tone Haeu.

<sup>13</sup> Tataen ien wanen, xux nuea eliel. Teik ti huopanim ti lawe waliko leili tehu taon lalap i manan ape 7,000 seilon mat. Teteka laha kuosel ti tenen kawatan ien, ti mataualaha laha haxawa axe Haeu tel pate tuah.

<sup>14</sup> Kawatan huonen ape i tamusuen. Tenen kawatan i luluainima tutuen, sikole ape i tahia.

*Tehu suhusuh tapeinan*

<sup>15</sup> Ti tel engel tapeinan kuiniwa tehu suhusuhaun, kilan kinax tiloma tesol tone Haeu, laha ukek,  
 “Haeu tel Masiwi ti kaha ma Kraisi tetel i taloma,  
 lalu sohot Masiwi tapein ti tehu pon ie  
 ape lalu neini lawe seilon lian tehue.”

<sup>16</sup> Taen ien tetesol 24 masiwi lato toto he tesol totoan tuah mateiwai Haeu, lato lokuha lakua hani itan ape lotui Haeu. <sup>17</sup> Lato ukek,

“Haeu tel Masiwi tel pohen tapein,  
 tetel ti imat ma aope ie,  
 amite kak kemulik hani o nake ti lalape pohem  
 o hutuiwen neiniai lawe waliko.

<sup>18</sup> Teteka seilon laha kum lotui o, laha lengeini o  
 tuahe taun ti o leng pahoi lato ape i tahia wen.

Aope ie se taun ti o paxai kolongeni woi  
 lawe seilon ti laha matewen.

Ape o kahui hasolia  
 teka unauam ti kului ai kaka iam,  
 teteka laha haxawa axam ma hatesol seilon tetam  
 kalak axalaha lalap ma na kumahe.

Ape o aile hialalu tamusuke teteka laha aile hahialalu  
 lawe waliko ti tehu pon ie.”

<sup>19</sup> Muhin tehu Ingi Haeu ti tesol tonan i hea ape lawe seilon pon ningahiai tehu lohe kakain tuah ti Haeu xinotiw en kapi teka seilon tetan. Ape usil xepaxep, kuhuh tonuton, xux nuea eliel ma puli akah lalap tenen pate waiwain i put hahani itan.

## 12

*Tel hehin ma tok loloma lalap*

<sup>1</sup> Imuh tenen waliko pate lalap ma hahataxin wanen sohotuma tesol tone Haeu. Nga ningahi tel hehin alon pupuxui i ma tehu pangapang hahitake aen. Teik tahe patun se huopanim huohu kohot. <sup>2</sup> Tel hehin ien tian hina akaik. I tang aleleke moloan nake sikole i hatakaha tel akaik.

<sup>3</sup> Muhin tenen waliko liai tin pate lalap sohotuma tesol tone Haeu. Nga ningahi tok loloma kakan pate lalap wanen tepanim huohu patun. Tesol patun hina tah ani gol ma huopanim sula. <sup>4</sup> I xai wakoteni kolohen ape i haputa tenon ti kohot he maun hani itan. I tu mate tel hehin apepeas halekei tel akaik tataen ti na i ahutama.

<sup>5</sup> Ape tel hehin hatakaha tel akaik wawan. Tuae ti lehe tok loloma lalap tapei tel akaik, laha taxaxeiti i hani Haeu, kapi tehu totoan tuah tetan. Tel akaik ien imuh i tel neiniau lawe seilon ti xux texux texux ma tap tel pon hil pahoi. <sup>6</sup> Tel hehin ox hani he lohong, tetesol Haeu apeseni haniwen i. Ti ien i aununa leili 1,260 ngain.

<sup>7</sup> Tehu hilehile sohot hahutuia ti tesol tone Haeu. Maikel tel engel ma tesol engel hahitakan lato hilei tok loloma lalap ien ape tok loloma ma tesol tuaun hil pahoi.

<sup>8</sup> Tuae laha kum pon waxainiai Maikel ma tesol engel hahitakan ape lato usi xaxaweni laha ti tesol tone Haeu.

<sup>9</sup> Tok loloma lalap ien i se Satan, tetel hoi i pupuas ti imat wanen, lokon ti i tanoma hanowi weiko. Lawe i neini hakalala seilon ti ailei saun lialun. Ape muhi tehu hilehile, laha towi ahuti i ma tesol tuaun hani tehu pon itan ie.

<sup>10</sup> Muhin nga hong tenen kinax lalap ti tone Haeu ukek, “Taan ape i tahiawen ti Haeu awai seilon

ti lawe waliko lialun.

I kola lalape pohen ma soliai nenein tetan.



Ape Kraiss, tetel i taloma, i tel Masiwi ti lawe waliko.  
Satan ape laha towi ahutiwen ti tone Haeu.

I tel kemuk i tutu mate Haeu sului  
teka kahikahi Kraiss lawe ngain ma ipong.

<sup>11</sup> Lato waxaini Satan nake Jises Kraiss mat ukei  
kawatan ti lialui woulato.

Tin lato waxaini i ti lato kaxi ahuhuti kakai Haeu.

Ape lato kum nomuhini matealato

ti kolai xoxoi namilolato ti Jises Kraiss.

<sup>12</sup> Aile ape amuto tetesol toto ti tone Haeu, amuamua!

Tuahe lehe ape lialui lawe waliko ti

tehu pon itan ma kanitax

nake Satan ape i mos haniwen ien.

Lon pate lialun nake i ttoi ka

ngainun pate ape kukunun.”

<sup>13</sup> Ti tok loloma lalap ttoiwa ka i laha towi xoini haniwen  
he tehu pon itan, i usi nimai tetel hehin i hatakaha tel  
akaik wawan. <sup>14</sup> Tuahe tel hehin uke hupaun pai houn ape  
i ngong hani he lohong, tetesol Haeu apeseni haniwen i.  
Ti tesol ien i auna ti ahang toluhu tewaok ape tok loloma  
lalap kum pon aile halialuan.

<sup>15</sup> Imuh tok loloma lalap pusuini hasomu kan lehe i  
manuke xaxaweni tel hehin. <sup>16</sup> Tuahe hepekeun huali tel  
hehin. I kelaia ape kan ti tok loloma pusuiniwa i xiweu  
hatapo hani leilon. <sup>17</sup> Tok loloma lalap lon lialu hawane ti  
tel hehin. Ape i lua hilei tetesol laha nakuama ti tel hehin.  
Laha teteka laha hong ususi nauna ti Haeu ma tu xoxox  
ti Jises Kraiss.

<sup>18</sup> Muhin tok loloma lalap tu ulea ngixi peixux.

## 13

*Tok manihuh tumun kalimen ahutama itax*

<sup>1</sup> Muhin nga ningahi tok manihuh tenen tumun pate  
kalimen i ahuhutama itax. Patun tepanim huohu ma

huoanim sulaun. Patul he tesol sulaun tah ani gol. Ti he patun tehu tehu hina ax tenen i sosoxeni Haeu. <sup>2</sup>Tanome tok manihuh ien masin tok lepet tuahe anele aen masin anele ae ber a awan masin awe laion. Tok loloma lalap axi i poh ma hana i tel masiwi.

<sup>3</sup>Tehu ti pati tok manihuh tehu mahe naxon lalap ti ala i mat tuahe i mahuen. Teka seilon ongake hawane ape kilan ti laha sameni ma hong usi tok manihuh ien. <sup>4</sup>Laha lotui tok loloma lalap nake i hanawen tok manihuh tel masiwi ape tin laha lotui tok manihuh ien. Laha ukek, “Tap tel ulea kuin i akulai tok manihuh ie. Tap tel po tike i.”

<sup>5</sup>Haeu paxai lioi ti i to tel masiwi leili 42 pangapang. Ape tok manihuh kak hanasanas ma i ukek ka i se Haeu. <sup>6</sup>I kak saxuti Haeu ma halialu hetekie axan. Tin i kak halialu hetekie tesol tonan ma teka laha toto ien. <sup>7</sup>I uke poh ti hil tikei seilon ti Haeu. Ape i to tel masiwi ti teka seilon ti lawe xux ma lawe nenex, kakaialaha tenen tenen. <sup>8</sup>Kilan wanen seilon lotui i, tuahe teka seilon ti Haeu kum aile ukek ien. Laha teteka Haeu tai konginiwen axalaha imat ti i tanomi lawe waliko lehe laha uke tonain kapin ti tap tahi tapoan. Laha uke tenen tonain ien nake ti laha telei tok sipsip uluha, i mat ukei kawatan ti lialui woi seilon.

<sup>9</sup>Na amuto seilon ti hongoi kakain,  
amuto hong matainiwa.

<sup>10</sup>Teteka seilon ti Haeu namiloiwien kane kalabus,  
laha xoti ma kalabusi lato.

Teteka seilon ti Haeu namiloiwien lato mat  
nake ti usiai nauna tetan, laha telei lato.

Aile ape, tu xoxoa kahikahi Kraiss kalak kawatan tunahi amuto.

*Tok manihuh tumun kalimen sohotule hepekeun*

<sup>11</sup>Muhin nga ningahi tok manihuh liai tin tumun pate kalimen i sohotule leili hepekeun. Huohu sulaun he patun masin ti tok sipsip uluha tuahe sale kakaian masin

ti tok loloma lalap. <sup>12</sup> I sohot masiwi hanowi totok ti i ahuma itax. I puas hahitake axe tok ien. I lungei teka seilon lotuiai tok manihuh naxonaun mahuen. <sup>13</sup> I aile hasohotu waliko tenen lalap tataen hamosui ah ti he maun patul hanima tehu pon ie ti puli lawe seilon. <sup>14</sup> Lokon ti i aile tesol waliko lalap ien ti hahitake axe totok manihuh i ahutama itax, i neini hakalala teka seilon. Ape i lungei laha tanomia i tok manihuh hanowi tanome totok i ahutama itax, totok laha hamange ani ngol tuahe i moihin tutuen. <sup>15</sup> Tok manihuh i sohotule leili hepekeun, i uke poh ti axiai hanawain hani hosai tok manihuh i ahutama itax lehe i kak uke. Ape tel na i watakai lotuiai hosaun, i hani laha telei.

<sup>16</sup> Totok manihuh i sohotule leili hepekeun i lungei teka seilon ukei teik kikilam ti he minalaha manau ma na kawalaha. I lungei seilon tenen tenen, teteka axalaha lalap ma teka tap axalaha, teteka kilan soxi ma teka tap, teteka unau i seilon ma teka kumahe unau i seilon. <sup>17</sup> Tap tel pon hangaini ma kahui tenen na waliko, mewenae na i hina teik kikilam ien. Teik kikilam ien se axe totok manihuh i ahutama itax ma tin wexewex ti i kilami axan. <sup>18</sup> Mewenae seilon aneso i xeu tetenen ie. Teteka namilolaha xewan, kewak laha nam nexi tenen wexewex ien nake i kikilami axe tel seilon. Wexewex ti kilamiai totok manihuh i ahutama itax se 666.

## 14

### *Tok sipsip uluha ma 144,000 seilon*

<sup>1</sup> Ti nga to paxapax nga ningahi tok sipsip uluha tutu patul he Maunt Saion kapi tesol 144,000 seilon. Hina axe tok sipsip uluha ma axe tel Taman Haeu taian he kawalato. <sup>2</sup> Ape nga hong tenen kinax ti tone Haeu masin tangiai tainiai mau ma tonui kuhuh. Tangian masin wanen na kilan seilon xaxai harp.

<sup>3</sup> Tesol 144,000 seilon ien lato tu papakui tenen pak haun mateiwai tehu totoan tuah ti Haeu ma tetesol hinalo seilon hetekie tetesol 24 masiwi. Tap tel seilon liai pon pakuian, mewenae tesol 144,000 ien, tetesol Haeu awaiwen lehe lato sohot seilon tetan ti leili teka seilon ti tehu pon ie. <sup>4</sup> Lato tetesol lato hani hatapo tupualato usiai nauna ti Haeu ma aile hawanei pupuasan. Haeu kahui ahutiwen lato ti lialui woulato leili teka seilon liai ti tehu pon ie. Lato masin waliko tenen solian tapein ti pahalaha hani Haeu ma tok sipsip uluha. Lato halini puki lato ti ailei tuahe tenen na waliko lialun ape alomeni tupualato ailei lawe waliko ti Haeu pahan. Lato kahiti tok sipsip uluha tesol tesol na i neini lato. <sup>5</sup> Tap wanen lato po puputa. Tap tel pon tienialato ti tuahe na tenen.

### *Tolu engel*

<sup>6</sup> Imuh nga ningahi tel engel liai ngongong patul he maun. I kaxi ahuhuti meng solian ti Haeu tenen tap tahi sohiaian hani teka seilon ti lawe xux ma nenex, kakaialaha tenen tenen ti tehu pon ie. <sup>7</sup> I kak eliel ukek, “Kolawa lomuto haniwa Haeu ma haxawawa axan nake taun i xohiwen ti i paxai kolongeni woi lawe seilon ma i axi kawatan hani teka seilon lialun. Lotu sameniwa i, tel i tanomi maun aheah, tehu pon itan, kanitax ma lawe kan ti tehu pon ie.”

<sup>8</sup> Muhin nga ningahi tel engel usian. I kak ukek, “Babilon, tehu taon lalap i manan lialuen. Lehe ape lialui teka seilon ti Babilon! Laha neini hakalala seilon ti xux texux texux ti husele lialui woulaha.”

<sup>9-10</sup> Muhin nga ningahi ulea tel engel liai i kak eliel ukek, “Tekahaha lolotui totok manihuh tumun kalimen i ahutama itax hetekie tok hosau ma laha uke kikilam tetan he min manau ma na he kawalaha, ti lialui loi Haeu i lengeini laha ape i axi laha kawatan. Laha ilameni moloan pate lalap nake laha lua leili ah ti hina salfa, waliko tenen

poun i telei seilon. Tenen ien i sohot ti puli teka engel ti Haeu ma tok sipsip uluha. <sup>11</sup> Tehot ah ti luialaha tap tahi pehoan. Tap wanen hahei moloan hani teteka laha lolotui tok manihuh ien hetekie tok hosaun ma laha uke kikilam tetan.” <sup>12</sup> Aile ape, teteka ti amuto hong ususi nauna ti Haeu, tu xoxoa kahikahi Krai kalak kawatan tenen tenen tunahi amuto.

<sup>13</sup> Imuh nga hong tenen kinax ti tone Haeu i kak ukek, “Tai kewak, tataen ie ahua, tanusik teteka seilon laha mat ti laha unau Haeu tel Masiwi.”

Ape Holi Spirit kak ukek, “Salan wanen. Pake laha uke hanawain solian kahi puasain ma kawatan ti laha kau. Haeu paxai ttoi soliai pupuasalaha.”

### *Sale hinitiai seilon ti ngain tapeinan*

<sup>14</sup> Imuh nga ningahi tel seilon toto he teik maun papax-axun. Tanoman masin ka i tel Nati Seilon. He patun teik tah ani gol ma i akekeni tea pole pate angian.

<sup>15</sup> Muhin tel engel liai sohotuma he tehu Ingi Haeu ti tesol tonan ape i tilol eliel hani tetel i toto he teik maun. I ukek, “Hapuasawa tea pole ape apuhiniwa lawe an ti liai apesenan he tehu pon itan.” <sup>16</sup> Ape tetel i toto he teik maun i wakoti nami tehu pon ie tea pole ape lawe an ti liai apesenan i apuha.

<sup>17</sup> Muhin tel engel liai ahutama he Ingi Haeu ti tesol tonan. Tin i akekeni tea pole pate angian. <sup>18</sup> Ape tel engel liai ulea i ahutama he tesol tone waliko ti haniai Haeu. I tel masiwi ngahataiai tehot ah. I tilol eliel hani tetel i akekeni tea pole pate angian, i ukek, “Hapuasawa tea pole koti saluhiai tenen pata greip he tehu pon itan ape apuhiniwa huan nake ape i pamuen.” <sup>19</sup> Tel engel wakoti tehu pon itan tea pole ti koti apuhiniai huai greip ape i towi greip hani leili tesol tone pisihiai huai pata. Hunuiai kani greip i kilami lalape lengei Haeu. <sup>20</sup> Laha pexi hunui huai greip

ien melal ti taon lalap. Ape ti laha pepexi, kaka xiweu ahutama. I som hanowi somui mat sai huohu mita ma welui xiwewean sai 320 kilomita.

## 15

### *Paki Moses ma tok sipsip uluha*

<sup>1</sup> Imuh tenen waliko pate lalap ma tuah wanen sohotuma tesol tone Haeu. Nga ningahi tepanim hua engel ti axiai tepanim huohu kawatan tiliai lengei Haeu. <sup>2</sup> Muhin nga ningahi tenen waliko paxaian hanowi kanitax tenen masin kalas i talepalep hanowi xekei ah. Hina seilon tutu ngixi kanitax ien. Lato tetesol lato waxainiwen tok manihuh tumun kalimen i ahutama itax ma tok hosaun ma lato tai uke kikilam tetan. Lato akekeni tesol harp ti Haeu haniwen lato wexoiai tangiai pak. <sup>3</sup> Ape lato papakui tenen paki Moses tel unauai Haeu ma tok sipsip uluha i ukek,

“Tel Masiwi Haeu tel pohen tapein,  
soliai lalape pupuasam.

Tel Masiwi ti hatesol seilon,  
woum, kakaiaam ma pupuasam  
lawe sawisawin ma salan.

<sup>4</sup> Lehe aita tel na tap lon tetam?  
Lehe aita tel na kum haxawa axam?  
Mewenae o tetel sawisawin tapein.

Hatesol seilon lotu sameni o  
nake laha ningahiwen sawisawiai pupuasam.”

### *Tepanim huohu kapi hetekie tepanim huohu kawatan*

<sup>5</sup> Muhin Ingi Haeu ti tesol tonan i hea ape nga ningahi tesol Pate Tuah ti Haeu. <sup>6</sup> Tesol tepanim hua engel ti axiai tepanim huohu kawatan lato sohotuma leili Ingi Haeu. Puxuaulato papaxaxun ma i talehaleh. Patanawalato tahaian teik tah ani gol. <sup>7</sup> Kakanua, tel ti tetesol hinalo seilon ien hani tesol tepanim huhua engel tepanim huohu

kapi ani gol. Waliko ti leilon i kikilami lengei Haeu, tel tap tahi matean. <sup>8</sup>Ape axuan i xuh tesol Pate Tuah ti leili Ingi Haeu. I kola ka Haeu tel pate pohen ma axan lalap. Tap tel i soh uke hani ien atengi tataen tepanim huhua engel axi hatapoa tesol tepanim huohu kawatan.

## 16

### *Tesol engel xingini tepanim huohu kapi*

<sup>1</sup> Muhin nga hong tenen kinax lalap ahuma tehu Ingi Haeu, i kakane tesol tepanim huhua engel ukek, “Lua tihiwa lialui loi Haeu he tesol tepanim huohu kapi haniwa tehu pon itan.”

<sup>2</sup> Ti tel engel imat lua tihiwa lohe tehu kapieun haniwa tehu pon itan, naxon tenen pate lialun ma moloan i tan hani tetesol lato hina kikilam ti tok manihuh tumun kalimen ma lolotui hosaun.

<sup>3</sup> Ti tel engel usian tihiwa lohe tehu kapieun haniwa itax, kanitax kolita hani kaka tenen ati polun a patoto ape lawe waliko moihin leili kanitax laha mat.

<sup>4</sup> Ti tel engel liai tihiwa lohe tehu kapieun haniwa lawe kan ti unum ti tehu pon itan, lawe kan kolita hani kaka.

<sup>5</sup> Ape nga hong tel engel masiwi ngahataiai lawe kan ti tehu pon itan ukek,

“Haeu, tel sawisawin tapein, o hoi liai ti imat ma aope.

Haniai tesol kawatan ie se sawisawin nake  
paxai kolongenian tetam ti woi seilon se sawisawin.

<sup>6</sup> Teka seilon lialun teleiwen tesol kuluiwai kakaiam  
ma seilon tetam liai.

Ti matealato kakaulato kukumim hawane,  
aile ape Haeu hamakaka lawe kan ti unum  
kahi tesol teletele ien.”

<sup>7</sup> Lokon ien nga hong tenen kinax wixima tesol tone waliko ti haniai Haeu, i ukek,

“Haeu tel Masiwi tel pohen tapein,

salan wanen ka paxai kolongenian tetam  
ti woi seilon se sawisawin.

Aile ape tesol kawatan o hahani ie se sawisawin.”

<sup>8</sup> Muhin tel engel liai tihi lohe tehu kapieun hani he puli al ti hakekeaian lehe i mani hawane seilon ti kuiai kekeaian. <sup>9</sup> Ti laha lulua he kekei alon, laha to kak sasaxuti Haeu, tel Masiwi haniai tesol kawatan ien. Tin laha kum towiahu ti lialui woulaha ma laha kum haxawa lalape axan.

<sup>10</sup> Ti tel engel liai tihawa lohe tehu kapieun haniwa tehu totoan tuah ti tok manihuh tumun kalimen i ahuma itax, tilokoan atuhi hahutuia i ma teka seilon i neneini ape ti lalape moloan laha atalahi hamekimeki nisulaha. <sup>11</sup> Laha kak saxuti tatale Haeu tel Masiwi nake ti lalape molo naxon he tinulaha. Tuah tin laha kum nam tahane lialui woulaha ma laha tale tutuen tehitolaha hani Haeu.

<sup>12</sup> Ti tel engel liai tihawa lohe tehu kapieun haniwa tehu kan axan Epratis, i nun paxe apeseniai aweisali tesol masiwi ti angiaha. <sup>13</sup> Muhin nga ningahi tolu spirit lialun lato tanome kek tenen lalap. Lato tit ahuhutama he awe tok loloma lalap, tok manihuh tumun kalimen ma tok unauan pupuas hahitakan, totok i sohotule leili hepekeun. <sup>14</sup> Tetesol spirit ien lawe lato ailele waliko tenen lalap ti neini hakalalai seilon ape lato lua hani tesol tesol apuhiniai teka masiwi ti lawe xux ti tehu hilehile. I sohot ti ngain lalap ti Haeu tel pohen tapein ti i hiniti lawe seilon.

<sup>15</sup> Tataen ien Jises tel Masiwi kak ukek, “Hong matainiwa! Tahiaiak seilon kum amemene masin tel seilon ti xuxuina! Amuam hani teteka lawe taun laha mon atetengi tahiaiak. Laha masin tel seilon tenen puxuaun mewenae apesenan lehe i kum tunahi hienain ti uke na laha paxai i makahul.”

<sup>16</sup> Ape tetesol spirit lialun apuhini teka masiwi kane tehu hilehile hani tesol ti kakai Hiebru laha axai *Amagedon*.



<sup>17</sup> Ti tel engel tapeinan tihwa lohe tehu kapieun haniwa he maun, tenen kinax lalap wixima ti tehu totoan tuah ti Haeu leili Ingan. I ukek, “Ape i tilawen.” <sup>18</sup> Tataen ien usil xepaxep, muhuhui kuhuh i tonuton hahawane ma xux nuea elieliel. Lalape tehu nueai xux ien i tai sosohot lilian ti uli seilon nakuama. <sup>19</sup> Teka taon ti lawe xux manan. Babilon tehu taon lalap, i kelaia uke he tolunon. Haeu tai maluhe lialui woi teka Babilon ape i hani laha an wakin ti kolai lalape lengean. <sup>20</sup> Ape lawe xux ti itax hutoma kaluta ma lawe maunten matit manah. <sup>21</sup> Lalape puli akah putalih he maun tuhuke pexi teka seilon. Tesol puli akah ien pate waiwain a kawate tehu tehu i mei kewa sai 50 kilo. Ape ti lalape lialui kawatan ien, teka seilon to kak sasaxuti Haeu.

## 17

*Tel hehin ma totok manihuh tumun kalimen ti i ahutama itax*

<sup>1</sup> Imuh, tel ti tepanim huhua engel lato tihi tepanim huohu kapi, i nahih hani kapik ape i ukek, “Kahitima nga. Nga kola hani o sale Haeu axi kawatan hani tel hehin axan lalap ti ailei saun lialun i tu kikilami tehu taon lalap xohixohin kapi tesol kan tenen i kikiliwau. <sup>2</sup> Teka masiwi ti xux texux texux laha akati tel hehin ien ailei lawe waliko ti Haeu watakai. Ape teka seilon liai ti tehu pon ie laha hana hatapo tupualaha ailei saun lialun ien nake ti xoxoi isiai pahalaha.”

<sup>3</sup> Muhin tel engel kapiti namilok lehe nga ningahi waliko ti i sosohot he lohong. Ti ien tel hehin heihoi tok manihuh kakan tumun kalimen, totok i ahutama itax. Patun tepanim huohu ma huopanim sulaun. Hatehu tupuan hina ax taian tenen i sosoxeni Haeu. <sup>4</sup> Tel hehin pupuxui puxux tenen kakai xewan ma kakai ati polun. Paxaian solian wanen. He tinun hina pis ani gol ma hat

tenen pate tuah. I akekeni tehu kapi ani gol tuahe leilon xuhai waliko pate lialun masin waliko tenen kohan. I kola lalape lialui woi tel hehin ien. <sup>5</sup> He kawan hina kakain i kikilami lialui pupuasan, i ukek,

“Nga se Babilon tehu taon lalap.

Nga tel tini teka weli ailei saun lialun

ma lawe waliko ti Haeu watakai hawane seilon aile.”

<sup>6</sup> Tel hehin ien amuke hawane ti laha telei teka seilon ti Haeu, teteka lato tu xoxox ti usiai woi Jises. Paxai ai tel hehin masin tel seilon ti i un taxitaxiawen. Nga ong mamata hawane ti nga ningahiwa saun tenen ien.

<sup>7</sup> Tel engel kakane nga ukek, “Kum nam tataxini. Nga kaxi haxewa hani o sale pupuase tel hehin ma tok manihuh i heihon, totok patun tepanim huohu a huopanim sulaun. <sup>8</sup> Tok manihuh tumun kalimen ien ti o niningahi, i kumahe moihin ao pe ie. Ti imat i moihin ape imuh tin i moih alia. I sohotule leili tewau wal pate walawalan wanen. Tuahe ti tapeinan Haeu telei tamusuke i. Kilan seilon laha ongake hawane taen ti laha paxaiwa tok manihuh ien. Laha se teteka seilon Haeu kum tai kongini axalaha lilian ti tanomia i lawe waliko lehe laha kum uke tonain kapin ti tap tahi tapoan. Laha ongake hawane nake kemuk tok manihuh ien moihin, muhin i mat ape i moih alia uleawen.

<sup>9</sup> “Mewenae seilon aneso i xeu sale tetenen ie. Tesol tepanim huohu pati tok manihuh ien i kikilami tepanim huohu maunten ti tehu taon lalap, tetesol ti tel hehin neneini seilon. Tetesol patun tin i kikilami tepanim hua masiwi. <sup>10</sup> Tepanim ti lato laha hatapoan ti masiwi, tel toto tutuen masiwi ma tel ulea i po sohot masiwi tuahe nenein tetan teik kukunun. <sup>11</sup> Totok manihuh kemuk i moihin tuahe ao pe i maten, i tin se masiwi masin tepanim huhua liai ape imuh i to ulea masiwi. Tuahe ti tapeinan Haeu telei tamusuke i. <sup>12</sup> Tesol huopanim sulaun

o niningahi, i kikilami huopanim masiwi tuahe lato tai hutui nenein ti lato. Taen ti lato ukewa tonain ti masiwi, nenein ti lato kapi tok manihuh tumun kalimen tuahe ti teik taun kukunun. <sup>13</sup> Lato neneini seilon hetekie namil teikawe ma lato hong usi hawane tok manihuh tumun kalimen. <sup>14</sup> Lato hil pahoi tok sipsip uluha tuahe tok sipsip hetekie teka seilon tetan, teteka unauan wanen ti i kilamiwen, lato waxaini tetesol masiwi ien ma tok manihuh tumun kalimen. Lato waxaini tehu hile nake tok sipsip uluha i se Masiwi ti lawe masiwi, i Masiwi tapein ti neinia lawe masiwi.”

<sup>15</sup> Tin tel engel kakane nga ukek, “Tetesol kan ti tel hehin ailei saun lialun toto, i kikilami seilon ti lawe xux kakaialaha tenen tenen. <sup>16</sup> Tok manihuh tumun kalimen ma tetesol masiwi ti teka sula tu kikilami, imuh lato wataakai ma pahoxai tel hehin ailei saun lialun. Lato waxi lungei hatapo soxian ape i makahul wanen ti lawe waliko. Lato aile halialu tamusuke i masin na oha nimai anan. Ape lato towi i hani he ah. <sup>17</sup> I sohot ukek usiwa namili Haeu. I hani tok manihuh tumun kalimen to masiwi atengi tataen hatesol kakaian sohot ponowiwa. <sup>18</sup> Tel hehin o niningahi i tu kikilami teteka ti tehu taon lalap laha neneini teka masiwi ti tehu pon ie.”

## 18

### *Sale mananai Babilon*

<sup>1</sup> Muhin nga ningahi tel engel liai momosulih tone Haeu. I pate pohen ma lalape xewaiian haxewa hawane tehu pon itan ie. <sup>2</sup> I ausini eliel hawane, “Babilon tehu taon lalap i manan lialuen.

Malehe ape lialui teka seilon ti Babilon!  
 Tehu taon ien sohot tetesol ti kilai spirit lialun  
 ma manixux tupuxa tetenen hahalin ti seilon ani  
 ingai.

<sup>3</sup> Teka Babilon neini hakalala seilon ti xux texux texux

usia kilai lialui woulato.  
 Ape laha hani hatapo tupualaha ailei saun lialun ien  
 nake ti xoxoi isiai pahalaha.  
 Teka masiwi ti xux texux texux laha akati teka Babilon  
 ailei lawe waliko ti Haeu watakai.  
 Ape teka hangainiai soxi uke hakila hawane moni  
 ti hamasamas ti teka Babilon.”

<sup>4</sup> Muhin nga hong tenen kinax liai luainima tone Haeu, i  
 ukek,  
 “Teka seilon ti Haeu, ahuta saliliwa Babilon  
 lehe amuto kum tuai lato ailei saun lialun  
 ma amuto kum uke kawatan ti lehe Haeu axi lato.

<sup>5</sup> Ti husele lialui woulato i hamanomano loi Haeu  
 ape i kum paxai lioi tenen saun ti lato ien.

<sup>6</sup> Haeu, o aliake haniwa lato  
 masin ti lato aile haniwen teka seilon liai.  
 Haniwa lato kawatan uke he huohu  
 ti waliko lialun lato aile haniwen laha.  
 Haniwa lato an wakin tenen poxan  
 i xoini ti lato haniwen seilon liai.

<sup>7</sup> Axiwa lato moloan lalap ma aile hatahaneawa lato  
 lapan masin wanen ti lato sameni aliake lato  
 ma amumuke soliai totonalato.  
 Lato hanasanas ukek ka lato to masiwi  
 ma tatahan kum tunahi lato  
 hanowi teka seilon axoalaha matewen.

<sup>8</sup> Aile ape Haeu axi hulutini lato kawatan,  
 tenen masin matemate, tatahan ma hitolo.  
 Ape Babilon i lua he ah atengi tataen tuahe palong.  
 I sohot ukek nake Haeu tel sulualato se  
 Masiwi tapein.”

<sup>9</sup> “Tetesol masiwi ti pon itan ie lato tuai teka Babilon  
 ailei saun lialun ma amumuke soliai totonalato, lato tang  
 tahane Babilon ti lato ningahi axui ah tule ti i lulua. <sup>10</sup> Lato  
 tu siasia nake sale lalape moloan ti teka Babilon uke, i  
 hamatau lato. Lato eseini ukek,

“Malehe ape lialui teka Babilon!

I tehu taon axan lalap  
tuahe ti teik taun pate kukunun  
ape lato kewen kawatan.’

<sup>11</sup> “Tekahangainiai soxi ti tesol tesol laha tang tahane nake tap ulea seilon kahuiwai soxialaha. <sup>12</sup> Tap wanen seilon kahuiwai waliko tenen masin gol, silva, hat tuah, maia pate solian wexoan tenen tenen, pata tuah tenen poun solian ma waliko tenen laha tanomi ani nisi elefen, samen, pata tenen kahun lalap, brons ma pot tenen pate solian. <sup>13</sup> Kemuk lato hahangaini waliko ti hanamui an, tesol waliko poun solian masin sanda, mer ma frankinsens, waen, wel, palawa ti an, komem, bulmakau, sipsip, hos ma karis. Lato hangaini hehetekie tataen seilon.

<sup>14</sup> “Aoape ie laha kakane teka Babilon, ‘Hatesol waliko solian ti lomuto al ape i tapo tamusuen. Lawe kilai soxiamuto tenen tuah ma kahun lalap ape i tapo kalutawen. Amuto kum pon uke aliakean.’

<sup>15</sup> “Ape teteka seilon totonalato soli ti hangainiai soxi hani teka Babilon, lato tu siasia nake sale lalape kawatan ti teka Babilon i hamatau lato. Lato tang tahane ukek,

<sup>16</sup> “Malehe ape lialui teka Babilon!

Kemuk i tehu taon axan lalap.

Soliai tanoman masin tel hehin

i pupuxui maia wexowexon tenen kahun lalap  
ma pis tenen i kamakam ma hat pate tuah.

<sup>17</sup> Tuahe ti teik taun pate kukunun laha hamanana hatapo kilai soxiamuto!’

“Hatesol huniwai waian, teka maho, teka kukuoxi laha ma teka laha waxeni totonalaha puasain ti itax, tin laha tu siasia. <sup>18</sup> Ti laha ningahiwa axui ah tule ti Babilon lulua, laha kak tang eliliel ukek, ‘Tap tehu taon soliaian tetehu ie lilian ti imat hanima aoape.’ <sup>19</sup> Laha towi pekeun hani

he patulaha kolai lalape tatahan. Laha tang kakak tutuen ukek,

“Malehe ape lialui teka Babilon!

Kemuk i tehu taon axan lalap.

Teka huniwai waian lawe uke halapa moni

ti hangaini hanialato soxi.

Tuahe ti teik taun kukunun

laha hamanana kalutini hatehu taon.’ ”

<sup>20</sup> Ape tenen kinax ti tone Haeu kak tatale ukek,

“Amuto teka ti tone Haeu, amuamua.

Teka kuluiai kakaian, teka aposel

ma teka seilon ti Haeu liai,

amukewa waliko tetenen ien.

Haeu ape i kahui aliake hani teka Babilon

lawe waliko lialun lato aile haniwen amuto.”

<sup>21</sup> Muhin nga ningahi tel engel pate pohen akeni lauti tehu pot lalap pate kawatan. I hok towi hani itax ape i ukek,

“Xoxoi tehu hokahoka ie pate masin ti

Haeu hamanana hawane Babilon

ape kaha kum ningahi ulea tehu taon ien.

<sup>22</sup> Tap kaha po hong ulea tangiai kita, kawakau,

suhusuh ma seilon pakupak.

Puasain ti tanomia i waliko ma apeseniai an,

tin tap i po sohot ulea.

<sup>23</sup> Hatehu Babilon to leili tilokoan

nake tap tenen i hahaxewa leilon.

Tap amuamu tenen masin ti salasala

i po sohot ulea ien.

Haeu hani tesol kawatan ien

nake teka hangainiai soxi leili Babilon

laha uke ax lalap

ti mongohe hamasamas ti teka seilon ti Babilon.

Tin kilan teka Babilon lato ailele saun ti pipis

ape lato neini hakalala teka seilon ti

xux texux texux.

<sup>24</sup> Teka Babilon kau kawatan tenen ien  
nake lato sa ti teleiai teka kuluiyai kakai Haeu  
ma teka seilon ti Haeu liai ti xux texux texux.”

## 19

### *Kakain ti sameniai Haeu*

<sup>1</sup> Muhin nga hong masin kinaxe seilon kilan ti tesol tone  
Haeu lato kak elieliel ukek,  
“Kako haxawawa axe Haeu!  
I tel Masiwi ti kaha, tel awaiakaha pate pohen  
ma solian tapein.

<sup>2</sup> Paxai kolongenian tetan ti woi seilon  
se salan ma sawisawin.  
I axi hawane kawatan hani Babilon  
nake laha masin tel hehin weli ailei saun lialun.  
Laha neini hakalala kilan seilon ti ailei waliko  
ti Haeu watakai.  
I kahui aliake hani laha nake laha telei teka unauan.”

<sup>3</sup> Lato tilol tuhituhi ukek,  
“Kako sameniwa Haeu!  
Babilon i lulua nake ti lialui woulaha.  
Kawatan ien tap tahi tapoan.”

<sup>4</sup> Tetesol 24 masiwi ma tetesol hinalo seilon, lato lokuha  
lakua hani itan lotuiyai Haeu ti i toto he tehu tonain tuah.  
Lato kak eliel ukek,  
“Salan wanen. Kako haxawawa axe Haeu!”

<sup>5</sup> Ape tenen kinax ahuma ti tehu tonain tuah ti tone  
Haeu, i ukek,  
“Hatesol unauai Haeu,  
teteka axamuto lalap ma teteka tap axamuto,  
amuto teteka hina lomuto ti Haeu,  
sameniwa i.”

<sup>6</sup> Muhin nga hong ulea masin kinaxe seilon kilan.  
Tangian masin tangiai tainiai mau ma tonui kuhuh. Lato  
tilol eliel ukek,  
“Kako haxawawa Haeu!

I tel Masiwi ti kako pohen tapein,  
i neini lawe waliko.

<sup>7</sup> Kako mal amuam hawanewa ma  
haxawawa lalape axan!

Tehu ngain lalap ti salai tok sipsip uluha i tahiawen.

Ape tel hehin lehe i uke axoan apeas tengeniwen i.

Tel hehin ien tu kikilami hatesol seilon  
laha soh ti Jises Kraiss.

<sup>8</sup> I pupuxui maia solian tenen pate papaxaxun  
ma i talehaleh.”

Puxuaun ien i kikilami soliai woi seilon ti Haeu.

<sup>9</sup> Ape tel engel kakane nga, “Taiwa tetenen, ‘Haeu amumuke teka i ilowi hani tehu angiaian lalap ti salai tok sipsip uluha.’” Tin i ukek, “Tesol kakain ien se kakain salan i ahuma ti Haeu.”

<sup>10</sup> Ti nga hongoa, nga lokuha lakua hani itan lotuiian tuahe i kakane nga, “Kum ailele ukek ien! Haeu tetel ala o lotui. Nga tuahe unau Haeu masin o ma teka akikikalu ti Kraiss, teteka laha tu xoxox usiai kakain salan tetan. Na seilon hong auni tenen kakain ien, lawe waliko ti laha kaxi ahuhuti se kakain salan i ahuma ti Haeu.”

*Tel seilon kiliwakei tok hos papaxaxun*

<sup>11</sup> Muhin maun aheah i hea ape nga ningahi tok hos papaxaxun ti tone Haeu. Tel kiliwakean axan Namil Xoxoan ma Salan. Paxai kolongenian tetan ti woi seilon ma hilehile tetan pahoiai teka watakaian, se sawisawin.

<sup>12</sup> Pulan kamakam hanowi xekei ah ma kilan tah ani gol he patun. Tenen ax taian he tinun tuahe tap tel i ttoi salangawan, mewenae i. <sup>13</sup> I pupuxui puxux weluwelun a pate kaka. Axan liai tenen Kakai Haeu. <sup>14</sup> Teke seilon ti hile ti tone Haeu kakahiti i. Tin lato kikiliwake hos papaxaxun. Lato pupuxui maia solian pate papaxaxun tenen i talehaleh. <sup>15</sup> He awe tel neinialato tea ngol ahutama pate angian i uke ti lehe i waxaini teka watakaian. Nenein



tetan hani laha pate ahian. Ti kolai lalape lengei Haeu i aile halialu laha masin tel i towi huai greip hani leili teik pipisih ape pexi hunui kanun. <sup>16</sup> He tehu puxuaun ma he kasope aen tenen taian ukek:

Tel Masiwi ti lawe masiwi.

Tel Masiwi tapein neinia i lawe masiwi.

<sup>17</sup> Ape nga ningahi tel engel tutu he alon. I tilol hani teka manixux tenen analaha xixioi teka maten, i ukek, “Ngong apuhama ti tehu angiain lalap ti Haeu apepeseni. <sup>18</sup> Ngongoma ani xixioi masiwi ti xux, masiwi ti teka seilon ti hile, teka hahitakalaha, xixioi hos ma teka kiliwakealaha ma xixioi lawe seilon, teka unau i seilon ma teka kumahe unau i seilon, teka axalaha lalap ma teka tap axalaha.”

<sup>19</sup> Ape nga ningahi tok manihuh tenen tumun pate kalimen i ahutawen ti itax ma teka masiwi ti xux hetekie teka seilon ti hile laha apupuha ti hileiai tel seilon kiliwakei tok hos ma teka seilon tetan ti hile. <sup>20</sup> Tuaehe tel seilon ien pohi kongini tok manihuh ien hetekie tok manihuh i sohotule leili hepekeun, totok kemuk i aile hasohotu waliko tenen lalap hahitake axe totok manihuh i ahutama itax. Tesol waliko lalap ien i aile ti neini hakalalai seilon, teteka laha uke teik kikilam ti tok manihuh i ahutama itax ma laha lolotui hosaun. Ape ati lalu laha towi hahamoiha hani he ah ti hina salfa, waliko tenen poun i telei seilon. <sup>21</sup> Hatesol seilon ti lalu ti hile, tel kiliwakei hos uke tea ngol weluwelun i ahutama he awan telei hatapoalato. Ape teka manixux ang xuh hawane xixiolaha.

## 20

### *Satan xinoti konginan ti 1,000 ahang*

<sup>1</sup> Imuh nga ningahi tel engel mosulih ti tone Haeu, tetel Haeu sowini haniwen i heiai mate tewau wal pate walawalan wanen. I akekeni teik sen samen. <sup>2</sup> Ape i pohi

xinoti tok loloma lalap. I se Satan, tetel hoi i pupuas ti imat wanen, lokon ti i tanoma hanowi weiko. <sup>3</sup> Tel engel towi xoini i hani leili tewau wal pate walawalan lehe i kum pon puluti ulea teka seilon. Tel engel matai kongini tewau wal ape i hana teik papakat ti kolaian ka tap tel seilon pon heian. Satan to leilon ahang 1,000 ape muhin tel engel oxoxi i ti teik taun kukunun.

<sup>4</sup> Ape nga ningahi tesol totoan tuah. Teka seilon toto ien Haeu hana lato masiwi ti hinitiai seilon. Nga paxai tioi ka lato tetesol kemuk laha telei nake lato tu xoxox kahikahi Krai ma kaxi ahuhuti kakai Haeu. Lato tai lotui totok manihuh i ahutama itax ma na hosaun. Tin lato tai uke kikilam tetan he kawalato ma na he minalato. Lato moi alia ape lato sohot masiwi neinia seilon kapi Krai ti 1,000 ahang. <sup>5</sup> Ien se uli moi hai seilon. Teka maten liai laha kum xahat atengi tataen 1,000 ahang tamusua. <sup>6</sup> Amuam lalap hani tetesol unau Haeu lato moi aliamu imat. Tenen kawatan ti luai leili ah ti tap tahi pehoan i kum tunahi lato. Lato aile hatapo waliko ti Haeu ma Krai kilami haniwen lato ma aweisalulato hani Haeu mewenae hean. Ape lato neini seilon kapi Krai ti 1,000 ahang.

### *Tapoi Satan*

<sup>7</sup> Ti 1,000 ahang tamusua, tel engel oxoxi Satan ti tewau wal pate walawalan. <sup>8</sup> Ape Satan puluti tatale teka seilon ti lawe xux. Laha axai teka seilon ien Gog ma Magog. I apuhini apeseni laha ti tehu hilehile lalap. Kilaialaha masin puli hepekeun, kaha kum wexe uke. <sup>9</sup> Laha luama tesol tesol kaliniai tehu taon Haeu waheni, tetehu ti teka seilon tetan toto. Tuahe ah ahulih ti tone Haeu ape i lui telei laha.

<sup>10</sup> Ape laha towi xoini Satan tel pulutiai seilon hani leili ah ti hina salfa, waliko tenen poun i telei seilon. Ien tetesol ti laha towiwen totok manihuh i ahutama itax ma

totok manihuh i sohotule leili hepekeun. Ape lawe ngain ma ipong lato lamani moloan tenen tap tahi tapoan.

*Taun ti Haeu hiniti seilon*

<sup>11</sup> Muhin nga ningahi Haeu toto he tehu totoan pate tuah a papaxaxun. Ti lehe i hiniti seilon, ape tehu pon itan ma maun aheah i man kaluta huluta lian tehue. <sup>12</sup> Nga ningahi teka laha matewen, teteka axalaha lalap ma teka tap axalaha, laha tutu mateiwai tehu totoan tuah. Ape teka engel hei tesol pepa hina woi hatesol seilon. Muhin lato hei teik pepa liai hina axe teka seilon ukei tonain kapi Haeu ti tap tahi tapoan. Ape Haeu hiniti hatesol seilon usiwa saun ti laha ailewen, taian leili tesol pepa ien. <sup>13</sup> Hatesol seilon ti laha matewen, laha tu hahitake hinitian ti Haeu, teteka laha mat ti itax, teka ti leili amal ma teteka ti tesol Hades, tetesol tone teka maten. Tel tel ti laha Haeu paxai kolongeni woulaha ape axi kahulaha usiwa waliko ti laha ailewen. <sup>14</sup> Ape Haeu aile halialu tamusuke pohe matemate ma tesol tone teka maten. Tek a ti Haeu paxai ukek laha seilon pate lialun, laha kau kawatan leili ah ti tap tahi pehoan. <sup>15</sup> Hatesol seilon ti tap axalaha leili teik pepa ukei tonain kapi Haeu ti tap tahi tapoan, i towi laha hani tehot ah ien.

## 21

*Tehu Jerusalem haun*

<sup>1</sup> Muhi Haeu hiniti kewa seilon, nga ningahi maun aheah ma tehu pon itan haun nake ti imat ati lalu kalutawen hetekie lawe kanitax. <sup>2</sup> Ape nga ningahi tehu taon ti Haeu, i ape tehu Jerusalem haun. I mosulih ti tone Haeu. Soliai tanoman masin tel hehin i apepeas ti tehu salaian.

<sup>3</sup> Ape tenen kinax ahuma ti tehu totoan tuah ti tone Haeu, i kak eliel ukek, “Hongoa! Tataen ie ahua, Haeu aile tonan kapi teka seilon tetan ape i to hamalum kapi

laha. I neini laha ape laha pakata xox kapin. <sup>4</sup> Ape tatahan kum hatangi ulei laha nake Haeu xaxaweni hatapo lawe kawatan. Tap matemate, tap tatahan, tap tangitangi ma tap moloan ulea nake sale totone seilon ti imat ape i tamusuen.”

<sup>5</sup> Ape tetel i toto he tehu totoan tuah ukek, “Nga aile sohi hauni hahatapo lawe waliko.” I kakane nga, “Taiwa tesol kakain ien nake se salan ma pon hawane ti seilon soh.”

<sup>6</sup> Tin i kakane nga ukek, “Ape i tilawen. Nga se Alfa ma Omega, tetel imat ma tetel tapeinan, tetel ti hutuai ma tiliai lawe waliko. Tel na pahan is hawane nga tel ngahatian, ti soliai ongak nga aile hasolia totonan. Ien masin na tel seilon kinawen paxepaxen ti tel seilon liai neini axi hakila unuman kan ape tinun i xux. <sup>7</sup> Tesol soliai waliko ien ukean teka laha waxaini saliniai totohong ma saun lialun. Teteka seilon ien, nga ngahati hahawane ape laha sohot natuk wanen.

<sup>8</sup> “Tuahe teka laha mamata ailei pupuasak, teka laha tale tehitolaha hani nga, teka laha to ailele waliko tenen ti hahien, teka teleiai seilon, teka ailei saun lialun ti wawan hehin, teka laha hapuasa apelaha hiliai seilon, teka laha lotui waliko liai kumahe Haeu ma teka seilon ti puputa, laha hatesol kane ah ti hina salfa, waliko tenen poun i telei seilon. Pate tap tahi tapoi kaui kawatan ien.”

<sup>9</sup> Muhin tel ti tesol tepanim huhua engel lato hina tepanim huohu kapi xuhai tepanim huohu tapeini kawatan, i kakane nga ukek, “Kahitima nga lehe nga kola hani o tehu Jerusalem haun, i kikilami tel hehin i apepeas ti sal hani tok sipsip uluha.”

<sup>10</sup> Tataen ien Holi Spirit kapiti namilok ape tel engel neini nga hani he tehu maunten patul wanen. I kola hani nga Jerusalem, tehu taon ti Haeu, i mosulih tesol tonan.

<sup>11</sup> I xuhai xewai Haeu. I talehaleh masin tehu hat tuah ma

talepaian hanowi na alon hokai kanitax. <sup>12</sup> I hina titieh pate xawaxawan ma tiatian ani pot hetekie huopanim huowau aweing. Ti tewau tewau, tel engel petenian. He kahip ti tesol aweing ien hina axe huopanim huosol nenex ti teka seilon ti Israel. <sup>13</sup> Toluwau aweing lato sai angiha, toluwau sai tola, toluwau sai haiup ma toluwau sai ahang. <sup>14</sup> Titieh ti tehu taon, laha atai patul he huopanim huohu pot lalap. Tehu tehu pot hina axe tel tel ti tesol aposel ti tok sipsip uluha.

<sup>15</sup> Tel engel i kaakane nga i akekeni teik pata ani gol ti kolongeniai lape tehu taon, tehu tiehan ma aweingun.

<sup>16</sup> Hahinalopaun ti tehu taon welualato se tenenawe. Weluan tin masin tiaun. Ti tel engel kolongeniwa lapan, i tunahi ka weluan sai 2,220 kilomita. Tiaun ma xawaian lapan tin masin weluan. <sup>17</sup> Tin i kolongeni lape tehu tiehan ape i tunahi ka xawaian sai 66 mita. I usi aliake sale kolongenian ti teka seilon ti lokon ien.

<sup>18</sup> Tehu tiehan laha uke ataian tenen pot buah axan jasper ma hahatu taon laha uke ataian ma tanomian gol tenen pate xewan masin malewai kalas haun. <sup>19</sup> Tesol huopanim huohu pot lalap tutuhi tehu titieh ti tehu taon, ti hasoliai tanome tehu tehu laha uke pot buah tenen tenen. Axe tesol pot buah ien se jasper, sapaia, agate, emerald, <sup>20</sup> oniks, karnelian, krisolit, beril, topas, krisopras, jasint ma ametist.

<sup>21</sup> Tesol huopanim huowau aweingi tehu taon laha uke tanomian hat tenen pate buah a lalap. Lalape tehu ti tesol hat ien i pon tanomia i tewau ti tesol aweing. Hatesol aweisal leili tehu taon se ani gol, xewaian masin malewai kalas haun.

<sup>22</sup> Nga tai ningah tunah tehu na ingi lotu leili tehu taon ien nake Haeu tel Masiwi pohen tapein ma tok sipsip uluha lalu se ien ti lehe seilon lotui. <sup>23</sup> Leili taon

tap pupuase alon ma pangapang haxewaian nake xewai Haeu i haxewa hawane ien ma tok sipsip uluha se masin xewai alon i haxewa lawe waliko. <sup>24</sup> Teka seilon ti xux texux texux laha waxa ti xewaialalu ma teka masiwi tenen tenen laha kau kilan soliai soxialaha hani leili tehu taon ma sameni hahawane Haeu. <sup>25</sup> Tap tahi konginia tesol aweingi tehu taon nake tap ipongoan. <sup>26</sup> Hatesol seilon ti tehu pon itan tin laha kau kilan soliai soxialaha ma laha haxawa axe Haeu ma tehu taon tetan. <sup>27</sup> Hatesol waliko lialun se hahalin leili tehu taon ien. Tap tel ailei waliko tenen ti hahien ma puputa pon soh hani leilon, mewenae teteka seilon axalaha taian leili teik pepai tok sipsip uluha ti ukei tonain kapi Haeu ti tap tahi tapoan.

## 22

### *Tehu kan tuah i kikilami tonain kapi Haeu*

<sup>1</sup> Imuh tel engel kola hani nga tehu kan i xiwewema ti tehu totoan tuah ti Haeu ma tok sipsip uluha. I pate xewan ma i talepalep. I se tehu kan tuah i kikilami tonain kapi Haeu ti tap tahi tapoan. <sup>2</sup> I kikiliwau patalal ti tewau aweisal lalap ti tehu taon ti Haeu. Pape tehu kan hahupaun hina pata tenen i waxeni haweluwelu totone seilon. Lawe i hua tapai pangapang tehu tehu, a kaun haewia seilon hanowi ti marasin.

<sup>3</sup> Tap tenen na waliko ti Haeu wataakai i po to leili tehu taon. Tehu totoan tuah ti Haeu ma tok sipsip uluha ien ape teka unau Haeu lotu sasameni i. <sup>4</sup> Hina axan taian he kawalato ape tataen ien lato pon paxaxai Haeu. <sup>5</sup> Tap wanen ipong leili tehu taon. Lato kum hapuasa tenen na kamaialato. Tin tap pupuase kamai alon nake puki Haeu tel Masiwi se haxewaialato. Ape nenein ti lato tap tahi tapoan.

<sup>6</sup> Muhin tel engel kakane nga ukek, “Hatesol kakain ie salan wanen. Pon hawane lawe seilon soh. Haeu tel

Masiwi, tel i hanamiloa teka kuluiiai kakaian, i taloma tel engel tetan kaxi haniai teka unauan waliko ti lehe i sohot.”

*Jises tahiaian ape i xohiwen*

<sup>7</sup> Jises ukek, “Hongoa! Tahiaiak kapimuto i xohi hawanewen. Haeu amuke teteka laha hong tamani kakain taian leili teik pepa ie ti i kakaxi waliko ti i sohot imuh.”

<sup>8</sup> Nga Jon, nga hong ma ningahi tesol waliko ien. Ti nga hong ma paxai kewa, nga lokuha lakua hani itan lotuiwai tel engel i kola hani nga tesol waliko ien. <sup>9</sup> Tuahe i kakane nga, “Kum ailele ukek ien. Haeu tetel ala o lotui. Nga tuahe unauan masin o hetekie teka tuaum kuluiiai kakaian ma teka laha hong tamani kakain taian leili teik pepa ie.”

<sup>10</sup> Ape i kak ulea ukek, “Kum pupuluhini meng ti he teik pepa ie nake taun ape i xohiwen ti lawe waliko ti i kakaxi i sohot. <sup>11</sup> Imat ti tahiai Jises, teka seilon woulaha lialun laha aile aheheke saun lialun. Teteka ailei waliko ti hahien laha sohot lialu hawane. Tek a seilon solian laha soli aheaheha. Ape teka laha hana hatapo tupualaha ailei puase Haeu laha xox ahe tatale.”

<sup>12</sup> Jises ukek, “Hongoa! Tahiaiak kapimuto i xohi hawanewen. Nga kahui hapoponowi hani amuto usiwa waliko ti amuto ailewen. <sup>13</sup> Nga se Alfa ma Omega, tetel imat ma tetel tapeinan, tetel ti hutuiwai ma tiliai lawe waliko.”

<sup>14</sup> Haeu amuke teka seilon laha hong tamani nauna tetan. Teteka ien Haeu sowini hani laha soh hani leili taon tetan ma aniai huai pata tenen i waxeni haweluwelu totonalaha. <sup>15</sup> Melal ti tehu taon ti Haeu, teka seilon pate lialun wanen, teteka laha hapuasa apelaha hiliai seilon, teka ailei saun lialun ti wawan hehin, teka teleiai seilon, teka laha lotui waliko ti kumahe Haeu ma teka laha wangiti saun ti puputa.

<sup>16</sup> Ape Jises kak ulea ukek, “Nga talo tel engel hahitake axak kaxi ahutiai tesol waliko leili teik pepa ie lehe hatesol kahikahik laha tioi hawane. Nga kahi nati David tel Masiwi, nga nakuama tetan. Nga masin tehu kohot towisaian pate xewan.”

<sup>17</sup> Ape Holi Spirit ma teka seilon ti Haeu ukek, “Nahima!” Lawe seilon laha hong soh kakain leili teik pepa ie, tin laha ukek, “Nahima!” Tel na pahan is hawane Haeu tel ngahatian, nahima ape ti soliai ongan i aile hasolia totone tel seilon ien. Ien masin na tel seilon kinawen paxepaxen ti tel seilon liai neini axi hakila unuman kan ape tinun xux. <sup>18</sup> Nga Jon, nga hahongo hawane tel tel ti teka laha ridai kakain taian leili teik pepa ie. Na tel i hasea meng liai tenen ti leili teik pepa ie, tin Haeu axi hasea i kawatan ti teik pepa ie kakaxi. <sup>19</sup> Ape tel na i hatae tuahe tenen na meng leili teik pepa ie, Haeu kapitini tetan lawe waliko solian ti teik pepa ie kakaxi. Na masin ien, Haeu kum sowini hani i soh hani leili tehu taon tetan ma aniai huai pata tenen i waxeni haweluwelu totone seilon.

<sup>20</sup> Jises, tel i ukek ka hatesol kakain leili teik pepa ie se salan, i kak ukek, “Salan, tahiaiak pate ape i xohiwen!”

Jises tel Masiwi, lua hanima kapimite!

<sup>21</sup> Lalape soliai Jises tel Masiwi haniwa amuto teka seilon ti Haeu. Salan wanen.



## KAKAI HAEU

The New Testament in the Seimat language, The Ninigo Islands,  
Manus Province, Papua New Guinea  
Nupela Testamen long tok ples Seimat, Manus Provins, Niugini  
copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-14

Updates

[eBible.org](http://eBible.org)

---

PDF generated using Haiola and XeLaTeX on 17 Nov 2018 from source files dated 17 Nov 2018

9fa179b2-dd20-5dbd-9745-1fb6d5f9b415